

اخراج یا ویگا

إخلع يا ويكا  
قصص  
رضا الهجرسي  
الطبعة الأولى .. يناير ٢٠١٤

الغلاف : إيمان صلاح  
إخراج داخلي : **الحلم** للدعاية والاعلان

رقم الإيداع : ٢٠١٤/١٩١٥  
التقييم الدولي : 978-977-6412-54-5

إن دار الحلم للنشر والتوزيع، غير مسؤولة عن آراء المؤلف وأفكاره، وتعتبر الآراء الواردة في هذا الكتاب عن آراء المؤلف، ولا تعبر بالضرورة عن آراء الدار .



**الحلم للنشر والتوزيع**  
٤ شارع الأشراف من شارع مؤسسة الزكاة - المرج  
محمول : 01141824562  
dar\_el7elm@hotmail.com

# إفلع يا ويدا

قصة

رضا الهجرسي

oboiikan.com

مليون سنة .. (ق.خ )

فانتازيا ساخرة

obseikan.com

## الحلقة الأولى

تعيش أسرة (هو) في منطقة الكهوف العشوائية وهو رجل تخطى الأربعين عاما.. وأسرته مكونة من زوجته (هى) التى تخطت الثلاثين عاما.. وإبنة (يو) فى العاشرة من عمره.. وأبنته (رى) فى السادسة من عمرها.. وأسرة هو.. من الأسر الفقيرة اللى عايشة بالضالين.. فكل ما تمتلكه من حطام الدنيا عبارة عن ..

تنين عجوز وديناصور مهكع والتنين مربوط .. أمام الكهف من الخارج أمام فتحة ممتدة لداخل الكهف لينفث فيها النار كلما أرادت (هى) .. أن تطهو الطعام الذى يحضره (هو) من خروجه للصيد فى المنطقة المقشفرة.. والمسموح له ولأمثاله من فقراء القبيلة للصيد بها.. وهى منطقة يندر فيها الصيد لقلة الحيوانات وندرتها ..

يتقاتل كل فقراء القبيلة مع بعضهم البعض و يقتل بعضهم بعضا من أجل خرتيت يظهر فجأة.. أو خروف أو ماعز.. أو ديناصور هارب من المنطقة المحظورة المباششة والمحظور على فقراء القبيلة الصيد بها .. والمنطقة المباششة مليئة بكل أنواع الحيوانات وبكميات وافرة لا يسمح للصيد بها إلا لحاشية الحكيم الأكبر وأسرته وحاشيته من وجهاء القبيلة ..ومن يخالف ذلك يقتل فوراً.. .

الكهف من الداخل به سرير حجري ينام عليه هو وهى..  
وسرير حجري فى الجهة الأخرى من الكهف تنام عليه (ريوبو)

في نهاية الكهف توجد منطقة تخزين الحيوانات المقطعة ..وبالقرب من  
 الفتحة الذي ينفث فيها التنين ناره لتطبخ عليها هي ..  
 كان هذا اليوم يوم خروج هو للصيد ..  
 إعتدل في سريره وكانا يرتديان.. جلد جاموس برى ..  
 رفع هراوته الغليظة ونزل بها على رأس هي ليوقظها ..  
 هرشت بيدها على رأسها مكان الخبطة..وهي تتشاءب..  
 - قومي يا وليه ..فزي ..  
 - أياه يا راجل..بتصحيني بدرى كده ليه..لسه دودو معوأش..  
 - دودوعوأ من بدرى ..قومي أكليني ..جعان ..  
 - جعان..ده أنت لاهف لوحك قبل ما تنام..ورك خرتيت كامل وخروف  
 بفروته ..وقعدت تقزأز في ييجي أتناشر جوزفراخ..  
 - معرفش..أيه اللي كان سادد نفسى عن الأكل ..  
 - طب قوم صحى العيال ..وأخرج ولع لى ..توتو ..وخلي ناره هادية لحسن  
 شيط لى الأكل أمبارح ..على ما ربنا يرزقنا ونجيب توتو جديد ..لحسن ده  
 هكع وبيهب في وشى..  
 - معلش يا حبيبتى..أنا عارف إنك تعبانة معايا..بس أديكى  
 شايفة الحال..الصيد بقى شحيح أوى..والحكيم مش عايز  
 يفكها علينا شوية..ويسرب لنا شوية حيوانات من المنطقة  
 المباششة ..  
 - طب قوم..ومتتكدش على نفسك يا خويا..  
 أنت خارج للصيد..وأصطح وقول يا صبح..ومتتكدش عليه أنا  
 كمان ..وتفكرنى بالجوازة المنيلة بستين نيلة دى ..  
 تتحدث في همس  
 - كنتى فين يا لاه ..لما قلت آه ه ه..  
 - بتبرطمى تقولى أياه يا وليه ع الصبح ..

- مبقلش يا سبعى..يا مهنينى..وروح صحى الواد يو ..  
عشان ميتأخرش عن كهف المدرسة ..

تهمس

- وأنت تغور وتخف عن نفسنا شوية ..

يوه.. قصدى تسعى على رزقك يا خويا..

كان.. يو يرتدى جلد خروف ويتلحف بثعبان ضخم ليتدفأ به..

ورى.. ترتدجلد ماعز وتحتضن سلحفاة ضخمة..يربت عليها فى حنان..

ويرفع الثعبان من على يو ..

- قوم يا حبيبي ..عشان تلحق مدرستك قبل ما يقفلوا باب الكهف ويضيع

عليك اليوم ..أنت عارف يا حبيبي إن أنا حاطط كل أملى فيك وموت نفسى

فى الصيد عشان تكبر وتتعلم وتبقى حكيم من حكام البلد ..تنهب وتصطاد

فى المنطقة الملبشبة على كيف كيفك..

يمكن تطلعنا من السحت اللي أحنا عايشين فيه ده بأه ..

-لأ..مش رايح كهف المدرسة تانى ..حكيم الكهف ضربنى عشان أنت

مدفعتش المصاريف ..وقالى مجيش ألا معايا المصاريف ..

- ماشى يا حبيبي ..أنا رايح أصطاد وهاخد معايا دودو ..

ومش راجع.. ألا معايا مصاريفك ..

يركب الديناصورالمهكع مغادرا ساحة الكهف وتشير له هى مودعة قبل أن

يختفى خلف الجبل الكبير..وهى تصرخ

- قولوا معايا ..يا ولاد ..

كنتى فين يا ..لأه ..لما قلت ..أأأأأأأأأأه..

oboeikan.com

## الحلقة الثانية

واقفة هى فى حوش الكهف تلقى بالحبوب للطيور التى تلتف من حولها تلتقط الحب .. ويو يلعب مع ثعبانه الضخم فرحان عشان مرحش المدرسة ..ورى تركب على ظهر السلحفاة ..

تلمح هى سوسة العجوزة تحمل على رأسها حجر مسطح على شكل مستطيل رقيق السمك تسير على الجبل القريب .. تشير لها وتنادى عليها..

- سوسة ..خالتي سوسة ..تعالى ..متخافيش.. مش هنا.. تتجة سوسة ناحيتها وتقبلها فى ود شديد ..

سوسة إمراة تخطت المائة عام ولكنها ولا بنت العشرين فى رشاقتها تجلس معها أمام باب الكهف وتضع الحجر بجانبها.. وفى أرف.. -أنا عارفة يا ختى.. أنتى طايقة عشرة الجلف ده إزاي..

- ما أنتى عارفة يا خالة سوسة..إن دادى كان راجل شديد.. غصب عليا أجوزه ..وقالى ..ده راجل يسترك ويصونك ..

- معرفش ..أنا مطياوش ابدأ ..كشرى وإنف ..

- هو كمان ..ميطأش سيرتك ..ويقول عليكى ..أنك حشرية

وبتوقعى الكهوف كلها فى بعض ..وخرابة الكهوف العمرانة .. - أنا خرابة الكهوف العمرانة أنا ..أنا بوقع الكهوف كلها فى بعض

ده لا كان ليكي ولا كنتى ليه ..ولا كان ليكي الجوازة العدمانة  
دى م الأصل..شوفتى شى المعفنة اللى ضفرك برقابتها...  
أتجوزت واحد نصاب وحرامى..معيشها فى كهف كامل من مجاميعه..  
وجايب لها توتو أوتوماتيك ..بتشغله وهى جوة الكهف وتعلية وتوطية على  
كيفها من جوة الكهف..  
- معقولة!! من جوه الكهف..بأه الصدمانة العدمانة دى..  
عندها توتو أوتوماتيك ..  
- هى كمان ..بتقول عليكى كده برضة .. صدمانة وعدامنة  
وزودت عليهم ..معفنة ..أنتى عارفة أنا بحبك قد أيه ..ومقدرش أخبى  
عليكى حاجة..وأنا مش بوقع بينكم أنا بس بعرفك ..  
حبيبك من عدوك ..  
- عارفة يا خالتى عارفة ..أما أنا شايفاكى جاية من ناحية كهف المصدية دى  
..كنتى بتعملى أيه عندها ..  
- غصبتنى أجيب لها اللوح السحرى ..الى أنتى شيفاة ده ..  
- اللوح ده ..وده بتعمل بيه أيه ..  
- بتشوف فيه أحفادها بعد مليون سنة..أحوالهم أيه عايشين أزاى ..  
- فى اللوح ده !!!..شافتهم ..  
- شافتهم يا حبيبتى ..عايشين فى العز والهنا ..فى حاجة كده إسمها  
فيلا ..راكبين حاجة بتمشى لوحدها إسمها عربية  
-بأه شى المعفنة..شافت أحفادها..وأنا لأ..يالا افتحى اللوح المسحور وورينى  
أحفادى أنا كمان..بعد مليون سنة..عايزة أشوف العز والهنا اللى هما عايشين  
فيه..  
- أيوه يا حبيبتى..بس لازم تشحنه بكارت شحن..وعلى قد ما تشحنه ..على  
قد ما هتشوف فى أحفادك..  
- كارت شحن ..وأجيبه منين كارت الشحن ده يا خالة ..

- متحمليش هم ..أنا معايا واحد باقى..بس لازم تدفعى حقه ..  
أصله مش بتاعى ..ده بتاع صاحب اللوح المسحورلو بتاعى ..  
أنا معزهوش عنك أبدا يا حبيبتى ..  
- عارفة يا سوسة عارفة..وده يطلع بكام..أقولك خدي لك  
جوزين فراخ ..

- ميكفوش يا حبيبتى ..دول يا دوبك ..يوروكى شكلهم ..زودى جوزين كمان  
..عشان تلحقى تشوفيهم براحتك ولاشى المصدية أحسن منك ولا احسن منك  
.. دى شحنته بخرتيت كامل..

- كده ..طيب أنا هجييلك ..الخروف اللي حيلتنا..وأشوف أنا بأه  
ولا هى ..أحفادى ..ولا أحفادها ..بيننا على جوة الكهف  
تعالوا ..يا ولاد ..شوفوا أحفادكوا ..وأفرحوا بيهم..

oboeikan.com

## الحلقة الثالثة

- قرفصت هي ويو وري حول اللوح المسحور وسوسة تعزم عليه وتبدأ الصورة تظهر على اللوح المسحور.. فيروا
- صالة شقة بها طقم فوتية.. تجلس عليه سوسو والعجوز والتي تشبه سوسة..
- وبجانها هيام وتشبه هي والواد ياسر و يشبة يو.. وريهام وتشبه رى ..
- يرقص الأولاد.. والمرأتان تصفقان و يغنون ..
- وخلصناه... وخلصناه... وخلصناه..
- مبروك يا هيام يا حبيبتى.. مبروك يا ولاد.. أخيراً كسبتوا القضية وخلصتوه.. يا ساتر أنا عارفة كنتى طيأه عشرته أزاى.. ده حتى كان كشر وإنف.. أنا مكنتش أطياً شكله..
- هو كمان.. مكانش يطيأ يسمع سيرتك.. ويقول عليكى ..
- أن قدمك نحس وتخرى البيوت العمرانة.. وحشرية
- وبتوقعى الناس فى بعض..
- يا ختى.. جته شكة فى لسانه الزفر.. وبطللنا سيرته الزفرة
- دى.. أهو راح.. وراحت أيامه.. ده لا كان من توبك ولا
- أنتى من توبة.. شوفى البت المعفنة شوشو اللى
- متقبلهاش خدامة عندك.. أتجوزت جوازة الهنا.. العز كله شيفاه
- معاه.. أصل جوزها واد فهلوى ومرتشى من بتوع اليومين دول.. جاب لها
- بوتجاز أشعال ذاتى وغسالة فول أتوماتيك وعريية تشرح القلب ..

- بأه الصدمانة العدمانة دى ..عندها كل ده..
- هى بتقول عليكى كده برضة..بس يا واد يا ياسرعجبتنى قوى ..لما نفذت اللى قلت لك عليه تعمله قدام القاضى ولا أنتى يا ريماء يا أروبة أنتى..ده أنتى قطعى قلب القاضى - عجبتكوا لما لفيت رجلى بالشاش..وعرجت..ووقعت قدام القاضى ..وأنا بعيط وأقوله ..ضربنى بالحديدة على رجلى كسرهالى..مبقتش عارف ألعب مع صحابى بالكورة الشراب - ولا البت ريماء ..ربطت عينيها وعملت نفسها عمياء ..ورينا كده يابت يا أروبة ..
- تحط ريماء يدها على عينيها وتمدهم ذى الشحاتين..
- مش شايفة يا قاضى ..ضربنى بأيده على عنية ..من ساعتها مبشوفش..ومبقتش عارفة أتفرج على نانسى عجرم فى الدش - ولا أنتى يا هيام وحكاية أنه شمام ..ومقصر فى واجباته .. الزوجية..دى بأه خلت القاضى مستحملش ..خلعه على طول .. يهللون ويضحكون ويغنون..
- وخلعناه ..وخلعناه..وخلعناه ..
- هوب ..الصورة إنقطعت من على اللوح السحرى ..
- ويخرج لهم صوت إمراة رخيرم وقور ..
- نأسف لأنقطاع الأرسال ..لقد نفذ رصيدكم ..
- أياه هو ده يا خالتى سوسة ..ده أحناء ملحقاش نشوف حاجة ..
- على قد رصيدك يا حبيبتى ..
- بس أنا مفهمتش حاجة ..أياه الكلع ده..وشمام ..وواجباته الزوجية اللى مقصر فيها ..يعنى أياه ده كلة..
- لا ..دى سببها عليه أنا بأه..هفهمك كل حاجة ..وواحدة ..واحدة
- الأول ..أياه الكلع ده ..الى مفرح أحفادى قوى كده ..

- الخلع ..مش الكلع ..
- الكلع ..الخلع ..مفرحهم قوى كده ليه ..
- فتحيلى ودنك كويس ..وأنتوا يا ولاد ..قربوا واسمعوا
- الى هقولة كويس ..بأه لو فى واحدة زيك كده ..هه ..فهمانى ..زيك كده..
- مش طيأه جوزها..وتشوف العماولا تشفوش..وولاد زيكوا كدة ..مش طيأين
- أبوهم ..عشان منغص عليهم عيشتهم ومش سايبهم يلعبوا براحتهم ..وكل
- شوية .. ذاكر يا واد ..عيب يا بنت ..يقوموا يعملوا أيه..
- يعملوا أيه ..
- خالتكم سوسة تقول لكم تعملوا أيه ..تروحوا للقاضى..
- القاضى ..أيه القاضى ده ..ونلاقيه فىن ..
- القاضى ده..ذى الحكيم الأكبر بتاعنا ..يعنى أنتوا هتروحوا
- للحكيم ..وتعملوا ذى ..أحفادكوا ما عملوا..بالتمام
- أنت يا واد..هتقول أنه كسر رجلك لما جيت تحوشه عن أمك وهو بيضربها
- ..وأنتى يا بت ..
- عارفة ..ضربنى على عنية ..ومبشوفش..
- طول عمرك ..أروبة يا شبر ونص أنتى..وانتى يا هى هتقولى أنه
- مقصر فى واجباته الزوجيه ..وشمام
- طب وهوه أنا عارفة شمام يعنى أيه ..ولا أيه هي واجباته
- الزوجية دى ..الى مقصر ولا مطول فيها ..
- آه.. ليكى حق يا بت ..فانتتى دى ..أنتى عارفة يا بت ..
- شلة العيال الفسادانة الى يروحوا عند البركان الكبير
- ويفضلوا يشموا ..فى الغازات الى طالعة حوالين البركان ..
- ويونونو..ويعملوا دماغ ..وينزلوا نهب و سرقة فى الكهوف
- الكل سمع عنهم ..بس عمرهم ما جم ناحية الكهف بتاعنا ..كانوا بيخافوا
- من هوهو ..ويعملوله ألف حساب ..ولما يقربوا بس ناحية الكهف ..كان

يطلع لهم بحرته.. ويجريهم قدامه ذى الجديان..  
- أهو تكدي وتقولى.. أنه إتلم عليهم وكان بيروح معاهم البركان  
يشم الغازات.. ويرجع لكم.. مونون و عامل دماغ.. ويضربكوا..  
- بس ده عمره ما شم غازات.. ولا عمل دماغ.. ده جلفن ودهل..  
ومالوش فى المزاج.. ده لو شم ريحة وردة يدوخ..  
- يعنى جوز هيام.. اللى كان شمام..  
- وأنتى يا خالتى سوسة.. عرفتى ده كلة منين..  
- من اللوح المسحور يا بت.. ما هو أنا كل ما أشغله لحد  
الاقى واحدة من أحفادى.. حطة بوزها فى الموضوع..  
- طب شمام وعرفناها.. أيه بأه واجباته الزوجية دى..  
- دى بأه تقربيلى وذنك فيها.. عشان العيال متسمعش..  
- لا يا ختى.. أنا مقدرش أقول للحكيم الأكبر.. الكلام ده..  
أستحى.. وبعدين الحكاية دى بالذات.. هو فيها وحش كاسر.. ومش مقصر  
أبدا..

- وهو يعنى.. كان جوز هيام.. اللى مقصر.. بس هى كدبت  
وقالت كده.. عشان تخلعه..  
- أهو أنا بأه عايزة أعرف.. يعنى أيه.. تكلمه دى..  
- ييووه.. ده أنتى غبية قوى يا بت.. بعد ده كلة لسه بتسألنى  
وبعدين تقولى.. أخلعه.. مش أكلعه.. لحسن الحكيم الأكبر يضحك عليكى..  
- وهو الحكيم بتاعنا يعرف.. يعنى أيه الخلع ده..  
- حكيمنا.. يعرف كل حاجة.. ده عنده أحدث لوح سحرى  
فى مملكة الكهوف كلها.. وطقأطفى لى ودانك معايا..  
الخلع يعنى.. إن جوزك.. يتخلع م الكهف وميقدرش يبجى  
ناحيته.. وأنتوا تعيشوا على راحتكوا بأه.. وتلعبوا..  
وتهيصوا.. وبعدين تعبتونى.. أنتوا عايزين..

تخلعوه ..ولا.. لأ ..

يصرخون معا

- نخلعه..نخلعه..

تقف هي زنهار في جدية ..تصرخ فاتحة ذراعيها..

- قول يا زمن..

أكتب يا تاريخ..أن هي ..

أول ست في تاريخ البشرية.. تخلع جوزها

obseikan.com

## الحلقة الرابعة

يجلس الحكيم الأكبر على كرسية الحجرى وهو شيخ تجاوز عمره المائة وخمسون عاما يرتدى جلد أسد..دقنه قدامه متر وبياضها الناصع مديله هيبة ووقار ..حواليه واقفين نسواه الخمسين لابسين جلود الثعالب.. وطبعا أعمارهم من عشرة حتى الحيزبون الى عدت الميه ودى القديمة..والقديمة تحلى حتى ولو كانت وحلة .

دقنه البيضا اتبلت من كتر العياط بعد اللى سمعه من هى وولادها  
- بأه الخنزير ده..الخرع ..شمام الغازات ..عمل فيكوا كل ده ..  
وأنتى..يا أصيلة صابرة واستحملتى كل ده ..عشان عيالك ..  
طلباتك أيه يا أصيلة ..وهنفذها لك ..فى الحال ..  
- أكلعه م الكهف ..يوه..أخلعه يا حكيمنا ..أخلعه..  
- حقاك يا أصيلة ..حقك ..قررنا نحن حكيم الكهوف وكبيرها..  
خلع الخنزير هو ..من كهف الست الأصيلة ..هى  
وأولادها..ويحرم عليه الأقتراب من الكهف..حتى الجبل الكبير..  
ويتم حفر أسم ورسم ومأساة..الست الأصيلة هى..  
على جوانب الكهوف..  
وتسجل كأول ست تخلع جوزها ..

في تاريخ البشرية...

obeyikan.com

## الحلقة الخامسة

راجع الغلبان من الصيد إلى الكهف فرحان و سعيد ..  
عشان ربنا رزقه وفتح عليه وعرف يجيب مصاريف الكهف المدرسى لأبنته  
وكل أمله في الحياة..  
حط صيده في حوش الكهف ..  
وهوب ..  
هجم عليه حراس الحكيم الأكبر ..وكتفوه بالحبال..  
وسحبوه بره الكهف ..وهو مذبهل ومذهول ..  
وفضلوا يسحبوه ويجروه ..  
وبلغوه بأوامر الحكيم الأكبر ..  
بأنه مخلوع من الكهف ..وميقربش من الكهف ..  
وأخره ..  
الجبل الكبير..

oboiikan.com

## الحلقة الأخيرة

مزأططين وفرحانين ..بعد ما خلعوا الكابوس اللى كان كابس على نفسهم ..  
بيغنوا..

- وخلعناه ..وخلعناه ..وخلعناه ..

وهوب..؟؟

تطب عليهم شلة العيال الفسدانة ..شمين ومونونين..

ويقتحمون الحوش وهم يصيحون فى صرخات مرعبة..

تفر هى وولادها جوة داخل الكهف ..مرعوبين مذعورين

تسرق شلة العيال الفسدانة كل الحيوانات اللى صاهاها هو..

حتى التين العجوز معتقهوش .. وسحبوهم ناحية الجبل الكبير

تخرج هى وولادها إلى الحوش ..وفضلوا يعيطوا ملل لقوا الحوش فاضى وشلة

العيال الفسدانة سرقت كل اللى حيلتهم ..

فجأة

تظهر الحيوانات من خلف الجبل الكبير وهى راجعة إلى حوش الكهف ..

يقودها..هو..ويحطها مكانها ..

من غير ما يبص لهم ولا يعبرهم..

ثم يديهم ظهره فى غضب صبياني ذى العيال وعمل نفسه أنه عايز يمشى ..

تصرخ عليه بنته وهى مفلوقة م العياط ومرعوبة وبترتعش

من الخوف ..

- خليك متمشيش ..أنا خايفة ..

تجرى وترتمى فى حضنه ..

يشد يو ..أمه من ايدها ويضعها فى ايد أبوه ..

تمسك هى يد هو بقوة وهى بترجف ..

- خليك ..أحنا من غيرك كنا هنضيع ..

- وأنا من غيركم ..تهت فى دنيتى...

- بس بشرط ..تفضل حكايتى محفورة فى الكهوف ..

عشان أحفادى يقروها ..ويفتخروا بجدتهم ..

ويعرفوا إن هى كانت أول ست تكلع هو ..

فى تاريخ البشرية كلها..

يرفع هرواته الغليظة ..

فتجرى هى وولادها وهم يضحكون ..

# اخلع يا ویکا

oboiikan.com

# الخلع الأول

## اجنة الخلع )

جلس قاضينا سعيدا على منصة القضاء ..فهذه أول مرة يجلس فيها وحده على منصة القضاء ..ويحكم فيها دون أن يكون هناك مستشار أمين أو أيسر ..وأخذ يحدث نفسه ..

- هي صحيح قضية خلع بسيطة وسهلة ..والنهاردة هنطلب شاهد من أهلها وشاهد من أهله ونخلص ..إنما برضة .. أهى بداية ...  
ينظر للحاجب .. لينادى على القضية الأولى ..

- محكمة ..القضية رقم ثلاثاشر ...

- أياه النحس ده بأه ..أول قضية ليه يكون رقمها ثلاثاشر  
إتأكد يا ابنى ..

- يا فندم ..الرقم مكتوب على ملف القضية ..رقم ثلاثاشر ..

- طيب خلصنا ..ونادى عليهم..

- قضية خلع .. رقم ثلاثاشر..المرفوعة من السيدة شادية فتحى  
على زوجها اسماعيل عبد الوهاب..

تتقدم إمراة طاعنة فى السن تجاوزت الثمانين عاما ناحية المنصة منحنية الظهر يسندها رجل عجوز تخطى الستين من عمره

و إمراة فى الستين من عمرها ..يسرون جهه المنصة فى ببط شديد وهم يلهثون ..ينظر إليهم قاضينا فى ذهول ..ويوجة كلامه ..إلى المرأة التى تسند

العجوز ..

- على مهلكم ..على مهلكم خالص..خدوا نفسكم ليه بس يا ست شادية ..تعبتي تيتة الحاجة وجبتها معاكي احنا لسه مطلبناش شهود...

- مش أنا يا ابني..شادية...دى أمى شادية.. أنا بنتها ..بثينة ..

- أهلا.. ما هو اليوم باين من أوله ..مش رقم ثلاثاشر ..

عايزة تفهميني يا ست بثينة ..إن تيتة الحاجة دى هى اللى

رافعة قضية الخلع ...وأنت مين يا والدى ..

أكد اسماعيل اللى تيتة الحاجة عايزة تخلعه ..

- لا يا ابنى ..أنا محمود ..إبنها ..

- أبن مين ..

- أبن شادية ..

- ستك يا رب ..يعنى عايزين تفهموني أن دى شادية اللى رافعة

قضية خلع على اسماعيل..و أنت أبنها محمود ..

وهى بنتها بثينة...صح كده..

- ما شاء الله يا ابنى.. مخك كبير ..

ربنا يحرسك م العين يا حبيبي ..هو كده.. صح...

- ستك يا رب...يا ست شادية...يا ست شادية ..

هى مش سمعاني ولا أيه ..

- كلمي يا ماما ..القاضي ..

- راضى ..هو راضى ابنك جه معنا..

- لا يا ماما...القاضي..مش راضى ..

- آه ه ..القاضي ..الى بيخلع ..

- أيوه يا ماما ..القاضي اللى بيخلع..

- ماما .. ماما أيه يا حاج..

أيوه يا جدتي..أنا القاضي اللى بيخلع..

- طب مستنى أيه يا واد ..أخلعهولى ..

هو مين ..

- اشماعيل ..

- اشماعيل مين ..يووووه..اشماعيل مين

- أشماعيل جوزى ..يا واد ..

محمود وبثينة فى رجاء

- أرجوكمى يا ماما..أرحميننا... وكفاية فضايح ..

- لغاية كده كفاية..أنا ولادى كلهم فى مراكز حساسة وهتفضحننا..

- بطل يا واد أنت وهى ..هخلعه ..يعنى ..هخلعه ..

يجهش محمود وبثينة فى البكاء ..ويلهثون ..ويتنفسون بصعوبة يقفز قاضينا

من على المنصة ويسند السيدة قبل أن تسقط ..سقط محمودعلى الأرض

وهو يتنفس بصعوبة وأرتمت بثينة على أقرب مقعد وهى تجهش فى البكاء..

أخذ قاضينا يصرخ ..

- يا اخوانا ..مفيش دكتور فى الجلسة..عايزين دكتور ..للتلاثة يشير للحاجب

- تعالى يا ابنى شيل معايا ندخلهم المكتب عندى ..

بأه يا ربي أول قضية ليه ..تبقى ميتة ..بتخلع ميت ..

شيل يا ابنى ..شيل ..

التف من حول قاضينا الرجال الموجودة بالجلسة وحملوهم وأدخلوهم

مكتب القاضي ..حضر الدكتور..وأخذ يتنقل بين الثلاثة حتى أفاقوا وأستردوا

..أنفاسهم وأخرج القاضي الجميع..

- هه..أحسن دلوقتى ..وختوا دواكو ..طلعونى بأه من المتاهة

العجبية دى..وواحدة ..واحدة كده..قبل ما حد منكم يفيص

ده يوم أسود عليه..وعلى القضاء كلة..

فهمينى يا تيتة الحاجة..أنتى عايزة تخلعى اشماعيل ...ليه..

- وأنت مالك أنت...عايزة أخلعه وخلص..وقالولى.. إن انت اللى بتخلع..أخلعه من سكات ..

- كده ..تقوليلى إخلعه ..فاخلعه ..مش أعرف السبب الأول ..

- أنت حشرى كده ليه ..أنت مالك أنت ..أنت عليك تخلعه وبس..

- يا ماما ده القاضى اللى هيحكم ..ولازم يعرف السبب..

- أيوه يا ماما ..لازم يعرف عشان يحكم...

- لازم يعنى ..

- لازم يا تيتة أعرف ...

- طيب يا ابنى أمرى لله .. كان يا ابنى ..عشرته وحشة ..

وبتاع نسوان ..ضيع ثروته وفلوسه عليهم ..مفتكرلوش حاجة

حلوة ..عشرته كلها مرار..فى مرار ..

وكلة كوم وقسوته ع العيال دكوم تانى ..

يجهش محمود وبثينة فى البكاء والنهنهه ..

- لا ..أبوس أديكوا ..أتماسكوا شوية ...طب هو فىن جدنا اسماعيل

محضرش الجلسة ليه..

- والدى ياابنى ميقدرش يبجى ..لأنه مشلول ومييتحركش من على

سريه ووقاعد عند أختى بثينة هى اللى بتراعية

بقاله خمستاشر سنة ع الحال دى..اليومين دول ..

الدكاترة أجمعوا..أن السر الآلهى ممكن يطلع أى وقت ..

وماما لما عرفت أنه هيوودع خلاص ..صممت ترفع قضية الخلع ..

- يا مثبت العقل والدين يا رب ..هو خلاص يا تيتة هيتخلع م الدنيا

هتخلعى فيه أيه تانى ..

- بعد الشر عليه ..ويطول فى عمره..

- بتدعيه بطولة العمر..

- لحد ما اخلعه بس..يسترك يا ابنى ..أخلعهولى قبل ما يموت ..

- شوفي بأه ..أنا يعرف السبب الحقيقي ..وألا.. أنا اللي هخلع  
من القضاء كله..ومش هخلعهولك..راجل مشلول بقاله خمستاشر  
سنة ..قاعد عند بنته وأنتى قاعدة عند أبنك..  
يعنى لا ..بتشوفيه ولا بيشوفك...وعايزة تخلعيه..  
ماهو مخلوع م الدنيا لوحده ..الأ.. أنا لازم أعرف السر..  
- يعنى لازم تعرف السر الأول..  
- لازم .. وألا هيحصلى حاجة وطب ساكت بين أديكى ..  
- طب أقرب لى ودنك ..عشان العيال ..متشمعش..  
- أدينى قريت ..وأدى ودانى ..  
- بأه أنا شمعت يا ابنى ..إن الست إذا مات جوزها وهى على  
ذمته ..لما تموت بتعاشره فى الجنة ...  
وأنا يا ابنى مطقتش عشرته فى الدنيا ..  
يبقى هطبق أزاى عشرته فى الجنة..  
إخلعه يا ابنى قبل ما يموت الله يسترک ..  
وألا هضطر أعاشره فى الجنة..  
أنفجر قاضينا فى ضحك هستيرى ..  
نادى على الكاتب وهو غارق فى الضحك المتواصل  
- أكتب يا ابنى..قررنا نحن ..أكتب الأسم ..فى القضية رقم ثلاثاشر  
بتطبيق شادية ...كامل الأسم ..طلقة بائنة..خلعا من أسماعيل ..  
كامل الأسم ..  
أكتب تحت وبخط عريض وكبير وواضح

حتى لا تعاشره فى الجنة

oboiikan.com

## الخلع الثانى خلع .. فى التاسع

جلس قاضينا على مكتبه دخل عليه الكاتب وألقى بتحيةة الصباح  
وضع ملف مفتوح أمامه.. دخل خلفه عم خليل الفراش بالقهوة..  
- صباح الخير يا فندم ..قهوة سيادتك المظبوطة ..  
- تسلم إيدك يا عم خليل ..ورينى يا بنى قضية النهاردة ..  
- دى سيادتك قضية خُلع النهاردة .. وحسب طلب السيدة الخالعة تكون  
جلسة سرية ..  
- أنا مبخفش ألا من الجلسات السرية دى..بسمع فيها كلام وبلأوى نغم  
النفس..كل واحد منهم يفضل يتهم التانى بحاجات تقرف..ومتعرفش مين  
فيهم الصادق.. ومين الكذاب  
جاهزين برة ..  
- جاهزين ..على ما تخلص قهوة سعادتك ..  
- خمس دقائق ..ودخلهم ..  
يفتح الباب فجأة ..وتدخل فتاة فى العشرين من عمرها متوسطة الجمال..  
بطنها منتفخة أمامها بشكل كبير..  
تتحرك بصعوبة وتتأوه فى ألم وتصرخ طالبة خلعه..  
تسندها امرأة تخطت الخمسين ..ذات صحة مفرطة..و فتاة فى مقتبل

عمرها ..

الثلاثة يرتدون ملابس حمراء بشكل فاقح ..

توجه الموكب الأحمر .. إلى الفتوية .. وتمدت عليه الفتاة الحامل وهى ما زالت تتأوه وتصرخ طالبة خلعه ..

وقاضينا مذبهل ينظر إليهم بذهول تام .. دون أن يحرك ساكنا ..

حاول الكاتب إخراجهم .. أوقفه قاضينا .. بأشارة من يده ..

بعد أن تمددت الحامل على الفتوية .. توجهت الأم إلى قاضينا

جلست أمامه على مكتبه وهى تلهث .. وبعد أن إنتقطت أنفاسها ..

تنظر إلى قاضينا وهو ما زال مذبهلا .. فاغرا فمه في ذهول ..

- مش برضة يا خويا .. أنت القاضى اللى بيخلع ..

- ههه.. آه .. أبوه .. أنا يا خويا .. القاضى اللى بيخلع ..

- طب أخلعهلنا يسترك .. قبل القرن ما يطش ..

- قرن مين اللى يطش ..

- سلامة الشوف يا خويا .. قرن البنت بنتى .. أنت مش شاييفا قدامك بتنازع

.. والقرن خلاص قرب يطش ..

- أبوه يا ست الحاجة .. بس هنا محكمة .. مش مستشفى ولادة ..

- أبوه يا خويا .. ما أنا عارفة .. عشان كده .. جينالك عشان تخلعه

وبعدين تولد .. يسترك بسرعة .. عشان نوديهها .. المستشفى قبل ..

- عارف .. قبل القرن ما يطش .. أبوه يا ستى بس .. المفروض تجبيها بعد القرن

ما يطش وتولد .. وتسترد عافيتها وبعدين

تيجى تخلعه ..

- لأ .. أبوس أيدك .. لازم يتخلع .. قبل ما تولد .. والواد بييجى

- لا بأه .. لازم تفهمينى الحكاية .. وبسرعة قبل القرن ما يطش فى مكتبى

.. وتبقى حوسة ما يعلم بيها ألا ربنا ..

- أقولك وفهمك يا خويا .. حقك برضة ..

بأه جوزى الله يرحمه وييشبش الطوبة الى تحت دماغه ..  
 تصرخ الحامل ..فيفزع قاضينا ..  
 - الله يرحمه يا ستى ..إختصرى قبل قرنهما ما يطش ..  
 - متخافش كده يا خويا ..ويبقى قلبك رهيف ..ده كل نسوان العيلة  
 ولدت على أيدى..المهم جوزى ساب لنا ..أنا والبنتين دول بيت من دورين..  
 والبدروم الى تحت بنأجره..دخل علينا السمسار ومعاه المنيل ..  
 - أكيد المنيل ده .. يبقى جوزها المطلوب خلعه..  
 - اللة ينور عليك..إن جيت للحق..الواد دخل علينا دخلة تشرح القلب  
 الحزين..لابس أحمر فى أحمر..جزمته حمرة..شرايه  
 أحمر..و شعره صبغه أحمر..حتى فالثته الى تحت قميصه حمرا..ماسك  
 علم أحمر فى أيده ..  
 - علم أحمر ..ده علم روسيا ده يا حاجة ..  
 - لا يا خويا ..ده علم الأهلئ ..سلامة عقلك ..  
 - عقلئ..سيك من عقلئ دلوقتئ..الى باين عليه هيطش هو كمان ..كملئ..  
 - ما هو حاكم جوزئ ..الله يرحمه كان كبير مشجعى الأهلئ فى المنطقة  
 كلها..ومربئ البنتنئ ..على حب اللون الأحمر ..  
 -آه..عشان كده لابسين أحمر فى أحمر..كملئ..  
 - الله ينور عليك..قبل ما يموت جابنى أنا والبنتين وحلفنا ع المصحف ..ما  
 أدخل زملاكوئ البيت ..ولا جوز بناتئ ..  
 ألا بعد ما اتأكد أنه أهلاوئ ماصل أبا عن جد..  
 - وأيه اللئ حصل يا ستى ..الراجل جاى لكم وهو..لابس أحمر فى أحمر  
 ..وماسك علم أحمر..فين المشكلة بأه..  
 - أسكت..مش ربنا كشف ستره .. وطلع زملاكوئ ماصل ..  
 - وعرفتوا أزائ ..  
 - ما هو الأول كان مفهمنا ..إنه يتيم ومقطوع من شجرة ..قلنا بدال أهلاوئ

يبقى أحنا عيلته وناسه ..من عشر تيام جت تسأل عليه ست كبيرة..أتضح  
إنها أمه.. وكان مخبى عليها أنه أتجوز ..

- وليه كان مخبى عن أمه ..

- ما هو أنا قعدت..أدحلبها فى الكلام لحد ما جبت قراره وعرفنا أنه كداب  
وضحك علينا..وأنه زملاوى ماصل أبأ عن جد..

أبوه كان كبير الزملاوية فى الدقهلية كلها ..وهو بأه الكبير بعد موت أبوه  
..شفت المصيبة ..

- دى مصيبة فعلا ..طب يا ستى ما تدوله ..فرصة ..جايز يغير مع الزمن  
..ويبقى ..أهلاوى ..العشرة بتغير برضة ..

- ما هو ولاد الحلال قالوا نفس الكلام..ورضينا بكلامهم...  
- طب الحمدلله ..ليه بأه ..غيرتوا رأيكوا .وعايزين تخلعوه .. ومش تخلعوه  
بس ..ده قبل القرن ما يطش كمان..

- ما هو ده يثبت لك..إن الزملاوية مالهمش كلمة..يعنى شوف أحنا  
يا أهلاوية ..فوتاله كدبه وغشه.. وقبلنا نعاشره وهو زملاوى.. وحطينا على  
قلبنا حجر صوان أنا وبنتى .. شفت أصالة الأهلاوية ..وقلبهم الكبير..

- لا طبعا مشفتش.. يا أهلاوية يا أصيلة ..وبعدين خلصى..

- بعد التضحية الكبيرة دى ..يقوم الزملاوى الخسيس الخسع  
يصمم يسمى المولود.. شيكابالا..شفت قله أصل أكثر من كده ..

تصرخ الحامل صراخا عاليا طالبة خلعه..

- ألحقينى يامه ..القرن طش ..

تجرى الأم ويجرى قاضينا نحوهما ..فتمسكه من شعره وهى فى صراخ  
متواصل ..يدخل عم خليل وينقذ قاضينا من بين يدى الحامل الممسكة به  
بشدة ..وتصرخ الأم فى وجه قاضينا

- إلحقونا ببطانية ولا ملاية ..نستر بيها البت وهى بتولد..

ينظر قاضينا إلى خليل وهو يلهث بشدة ..

- إلحقتنا يا خليل..ببطانية ولا ملاية نستر بيها البت ..  
يجرى خليل مغادرا ..  
تصرخ الأم في وجهه قاضينا في حزم..  
- حد يسخن لنا شوية مية ..عايزين حلة مية سخنة بسرعة  
يجرى قاضينا ويفتح الباب ويصرخ ..  
- يا عم خليل ..حلة مية سخنة معاك ..  
يدخل خليل حاملا ملاية يغطي بها الحامل ويخرج مسرعا..  
يجلس القاضي مذهولا على مكتبه وهو ما زال يلهث ..  
يعود خليل وهو يحمل حلة مية سخنة..  
تصرخ الأم في غضب ..  
- أنتم قاعدين لية ..أفضلوا على برة من غير مطرود..  
يجرى قاضينا وخليل نحو الباب ويغلقه خليل خلفهم.. والصراخ لا ينقطع  
..وقاضينا يسير أمام الباب يمينا ويسارا.. في توتر..  
إصطدم بشاب يسير هو الآخر أمام الباب ذهابا وأيابا في توتر..  
ملابسه كلها بيضاء وبخطين..  
صرخ قاضينا ..في غضب..  
- اهدم يا ابني خيلتني ..أنت أيه اللي موقفك هنا .. ورايح جى ..رايح  
جى ..  
- أنا جوزها حضرتك..وأبو شيكابالا ..  
يضحك قاضينا وهو يضرب كفا بكف  
- الزملاكوى الكداب الغشاش ..والمطلوب خلعه قبل ما القرن يطش ..  
- هما فهموا سيادتك أيه ..أكيد كذبوا على سيادتك ..  
- الله ..مش يا إبنى أنت ضحكت عليهم وفهمتهم ..  
أنك أهلاوى عشان تتجوز بنتهم ..  
- جواز أيه سيادتك ..الى يخلينى أغير ذمتى ..وأنغصب على نفسى وأقول

أنى أهلاوى..ده لو كانت ملكة جمال العالم ..  
متقدرش تهز أتمائى للزمالك ..ابدأ ..ابدأ..  
- بعدين بأه...أنتم هتخربطولى دماغى ليه ...  
- إسمعنى حضرتك الأول ..وبعدين أحكم ..وأنا راضى بحكمك  
أنا كنت موظف فى مدرسة فى أجا ..جنب بلدنا ..جالتى ترقية نقل للقاهرة  
..وأنا غريب ومعرفش حد فى مصر .. رحى لسمسار قريب م المدرسة  
..يشوفلى سكن رخيص على  
قد المرتب..قالى مفيش سكن رخيص ويناسبك غير عند الجماعة دول..  
نصحنى أنكر زملكويتى ..وألبس أحمر فى أحمر  
نفذت نصيحتته وسكنت ..ومتعرفش حضرتك العذاب والكوايس اللي  
شفتها.. عشان قلت أنى أهلاوى وأنكرت زملكويتى ..  
- عذاب ..وكوايس كمان ..  
- تفكر سيادتك إن زملكاوى أصيل ذى ..سهل عليه أنه يقول أنه أهلاوى..  
أمى وأهلى كلهم قاطعونى لما عرفوا خيانتى للون  
الأبيض ..وأبويا وجدى ..كانوا بيجولى فى منامى ويتفوا على وشى .. ومش  
هما بس ..  
- فى حد تانى كان بيتف على وشك ..  
يبكى الزوج وينهه فى حرقه..  
- شيكابالا حضرتك ..شيكابالا..كانت تفته ثقيلة وتخينة قوى  
كنت أقوم م النوم مفزوع..ووشى كلة ملزق من كتر التف..  
- أفهم من كده أنك كدبت عشان تسكن ..مش عشان تتجوز..  
- أتجوز أيه حضرتك ..هو أنا حيلتى حاجة ..هى أمها الحربية دى..فضلت  
ترسم عليه..تبع لى فى أكل ..هدومى تتغسل وتكوى ..فضلت تقولى أنت  
رجلنا.. وأخطب لبنتك وما تخطبش لأبنك ..مش هتغرم حاجة ..الشقة  
جاهزة من مجاميعه..

أن جيت للحق حضرتك أنا حسبتها ..عروسة وشقة ..في الزمن الأغر ده  
..فرصة متتعوضش ..رحت متجوزها و حصل الى حصل ..أمى عرفت عنوانى  
وجت البيت..وخرجت الى فى عبها كلة..رجعت البلد غضبانة عليه ..أهلى  
قطعونى ..المهم ..قلت أصلح الأمور هنا مع حماق ومراقى الأول ..  
وبعدين أبقى أروح لأمى وناسى أصلحهم ..  
- طب ليه عامل مشكلة ..ومصمم تسمى الواد.. شيكابالا..  
- عشان حماقى عايزة تسميه أبو تريكة ..وأنا الموت عندى أهون ولا ابنى  
يبقى إسمه ..أبو تريكة على جثتى سيادتك..  
- يعنى أنت رافض يكون أسم أبك أبو تريكة ..وحماقك ..  
مش عايزة يكون أسم حفيدها ..شيكابالا ..  
- تمام حضرتك كده..  
- وأنا على فكرة ..هعتزل القضاء قريب قبل ما تجلبى نقطة..  
ينطلق صوت بكاء طفل مع زغرودة مجلجلة من الحماة ..  
تفتح الباب صارخة فى فرح..  
- وشك حلو يا قاضى ..توم يا قاضى توم ..ولدين ذى البدر..  
- الحمد لله ..ربنا حلها لكم من عنده ..  
واحد تسموه ..أبو تريكة ..والتانى شيكابالا ..  
وأنا هسيب لكم المكان قبل ما قرن عقلى يطش واتشل ..

obseikan.com

## الخلع الثالث ( طباخ الخلع )

بعد أن إجتاز قاضينا باب المحكمة الرئيسي متجها إلى مكتبه ..قابله الأستاذ فتحى عمار المحامى بإبتسامته العريضة التى تُظهر وسامته وبشاشة وجهه والتى تخفى عمره لرجل تخطى الأربعين ..أبيض البشرة ..مبالغ فى شياكة مظهره ..مادا يده مرحبا بقاضينا ..  
إبتسم قاضينا بخبث..

- صباح الخير يا أستاذ فتحى ..أكيد عندك قضية خلع النهاردة..  
- تمام سعادتك ..

- وطبعا لقمتمها الأسطوانة إياها..الى بتتكرر على لسان كل موكلاتك..

- يا افندم أسطوانة أيه بس ..

- ده أنا حفظتها يا متر ..تحب أسمعها لك ..ولا على أيه ما احنا  
هنسمعها فى مرافعتك دلوقتى ..

- والله سيادتك ظالمنى ..وده كلام الخالعة.. أنا باخده من طرف  
لسانها ..ووصله لسعادتك.. بأمانة المهنة وشرفها ..

- عايز تفهمنى إن كل موكلاتك ..عندهم نفس أسباب الخلع ..

ألا ما فى واحدة قالت حاجة جديدة ..معقولة ده يا متر..

- صدفة سعادتك والله .. صدفة ..

- صدفة غريبة قوى يا متر..الأغرب تصميم موكلاتك على الخلع  
باستماتة مذهلة..ومهما حاولت أخليهم يراجعوا نفسهم ولا يفكروا شوية..

ابدأ..يصمموا أكثر..نفسى أعرف السراللى ورا..تصميمهم ده

- لا سر ولا حاجة سيادتك ..ده م اللى شافوة من قهر وظلم وأهانة على أيد  
رجالتهم ..المفترية ..الوحوش..أبتسم القاضى ودخل حجرته وتناول فنجان  
قهوته ثم خرج متجها إلى قاعة المحكمة ..

نادى الحاجب على القضية الأولى ..أتجة فتحى إلى المنصة و بجانبه إمراة  
تخطت الثلاثين من عمرها..جميلة ..ممشوقة القوام فى أنوثة طاغية  
نظر اليها قاضينا وهمس لنفسه ..

- هو كل موكلاته كده..ذى القمر..مفيش مرة واحدة يتراجع عن واحدة..نص  
لبة.. الجدد ده وراه سر لازم أعرفة ..

يقدم فتحى التوكيل ..ويبدأ فى المرافعة ..فيوقفه قاضينا بأشارة من  
يده ..ويوجه حديثه للمرأة ..

- أنا عايز أسمع منك أنتى الأول يا هانم ..وبعدين المتر..لأنى حافظ  
مرافعاته صم..أفضلى يا هانم قوليلى..أنتى عايزة تخلعى جوزك ليه  
ترتبك المرأة ..وتنظر إلى فتحى مستنجدة به ..فيهمس فى أذنها ..  
فتهز المرأة رأسها وهى تستمع اليه ..فيقاطعهما قاضينا..

- أنت بتخششها ولا أيه ..

- ابدأ سعادتك ..موكلتى خجولة جدا ..ولا تستطيع مواجهه سعادتك  
..ولذلك وكلتنى لتوضيح ما عانتة وقاستة.. مع هذا الرجل المفترى ..

- يعنى مفيش فايدة ..هضطر أسمع إسطوانتك ..أسف أقصد مرافعتك  
أفضل يا متر ..أشرف آذاننا..

نظر فتحى إلى المرأة وغمز لها ..ولمحه قاضينا فإبتسم حين رأى  
المرأة تهز رأسها لفتحى وتخرج مندبل من شنطة يدها..وتبدأ الدموع

تسح من عينها بغزارة و تمسحها بمنديلها..فيردد قاضينا ضاحكا  
- جديدة حكاية المنديل والدموع دى.. يا متر ..  
- أنها دموع المهانة و الحسرة والندم .. دموع إمراة ..عاشت سنوات  
من الحرمان من حقوقها كأمرأة وأنثى ..مع رجل عاجزأن يعطيها  
حقها كزوج ..وتحملت على أمل شفاءه..سنوات من الحرمان تقاوم  
فيه أغراء شياطين الأرض ..وذئابها..  
يشير له قاضينا بيده ..بالتوقف..  
- كفاية كده يا أستاذ ..بقية الأسطوانة أنا حافظها صم ..  
ينظر قاضينا إلى المرأة ..  
- وطبعاً أنتى مصممة على خلعه ..مفيش فرصة للتفاهم خالص..  
فتهز المرأة رأسها بالموافقة ..وهى ما زالت تبكى بحرقه تمزق  
القلب ..يؤجل قاضينا الجلسة لسماع أقوال الزوج ..  
يضع فتحي يده على كتف المرأة وهو يواسيها ..ويجلسها في  
ركن القاعة ..  
يطلب قاضينا من الحاجب أن ينادى ..على القضية التالية ..  
ينادى الحاجب ..  
- القضية الثانية المرفوعة من السيدة..كوثر الجنائنى ..بخلع ..  
السيد فتحي محمود عمار ..  
تتقدم إلى المنصة سيدة محتشمة في مظهرها ..ذات جمال هادئ تخطت  
الثلاثين من عمرها ..ينظر قاضينا إليها في إحترام ..  
- مفيش محامى معاكى يا هانم ..  
- لا يا فندم.. أنا هتكلم عن نفسى ..  
- وزوجك ..حاضر معنا فى الجلسة ..عشان نسمعه..  
- أيوه ..وهو اللى كان بيترافع قدام حضرتك دلوقتى ..  
- مين ..الأستاذ فتحي ..ده أنا قلت تشابة أسماء ..

كان فتحى ما زال منهمكا فى مواسة المرأة ..حين سمع صراخ  
قاضيها عليه ..فنظر ناحية المنصة..حين رأى كوثر ..أبعد المرأة من جانبه  
بدفعة شديدة ..وجرى ناحية المنصة فزعا ..  
- أياه يا كوثر خير ..حصل حاجة للعيال ..طمينى ..  
يبتسم قاضيها فى شماتة لم يستطع أن يداريها ..  
- أطمن يا أستاذ فتحى ..محصلش حاجة للعيال ..ده حصل لأبو العيال  
..الست حرمكم المصون ..عايزة تخلع حضرتك ..  
- نعم تخلعنى أنا..الله هو اللى بنعمله فى الناس هيتعمل فيناولأأيه..  
- شوفى يا كوثر هانم ..أنا عايزك تاخدى راحتك على الآخر . بعبعى باللى فى  
قلبك وبراحتك ..  
تبدأ كوثر فى البكاء وتخرج مندبلا من شنطتها وتمسح دموعها ..  
- أقول لسيداتك ..أيه ..ولا أياه ..  
- طب أهدى وبطفى عياط ..وأمسحى دموعك ..  
- دى دموع المهانة والحسرة والندم ..دموع ست بتقاسى من الحرمان من  
حقوقها الشرعية ..كزوجة وأنثى ..  
يصرخ فتحى  
- نعم يا ختى ..حقوقك كأنثى ..أمال اللى حصل بنا أمبارح ده  
كان أياه ..دور كوتشينة ..  
- فعلا يا حضرة القاضى ..وهو أعترف دلوقتى أمام عدالتكم ..أن  
ليالينا الشرعية ..بنقضها فى لعب ..البصرة ..أو الشايب ..  
يبتسم القاضى ..وقد بدأ وجة فتحى الأبيض يحمر خجلا وصوته يرتعش ..  
وسألها مبتسما ..  
- ومين اللى كان بيغلب التانى ..  
- متصدقهاش سعادتك ..وأنا هثبت لك كدبها ..سألها كده ..لو أنا  
صحيح عاجز ..طب هي جابت التلت عيال دول أزاي ومنين ..

- أنا أشرح لسيادتك ..أنا لما إتجوزته ..كان فلة ..شمعة منورة ..  
راجل بكل معنى الكلمة ..لكن من يوم القطة السوداء ..  
قطة ..قطة أبيه يا كوثر ..  
- القطة السوداء يا حبيبي..الى طلعت لك في الضلمة تحت بير السلم  
ومن يومها والى جواله ميتحكيش ..الخضة ضيعت كل حاجة  
عشت من بعدها في حرمان ..ولعب الكوتشينة ..  
- كذب ..كل ده كذب ..أوعى تصدقها سعادتك ..كل ده كذب وأفترا  
يهز القاضى رأسه ..  
- يعنى أنت عايزنى..أصدق كل اللى بتقوله موكلاتك.. وأكذب  
مراتك..الست المحترمة الوقورة دى..  
بيتسم قاضينا لكوثر ..وقد أنهار فتحى وبدأت يده ترتعش ..  
- أنا عايز أسألك سؤال مباشر ..أنتى مصممة على خلعه ..  
لأن أنا..حاسس إن فيه حاجة غريبة و مش طبيعية في كلامك ..  
- أنا فعلا عملت ده كلة..عشان أدوقه من اللى بيطبخه للناس..  
ده يشوف واحدة حلوة.. يريل عليها ..ويخالف ضميره وشرف  
مهنته ..ويقعد يحفظها اللى تقولة..والبجح يبجى يحكىلى كل حاجة  
ويفتخر بنفسه أنه عمره ما خسر قضية خلع ..  
يضحك قاضينا ..  
-أفهم من كده..أنك بتحسسيه باللى حسس بيه كل زوج ..أدعى عليه  
بالكذب..وخرّب بيته..أنا بحبيكى يا هانم على الخطة الذكية دى ..وبكرر  
سؤالى ..أنتى مصممة على خلعه ..ولا كفاية عليه كده  
-أنا مستعدة أتنازل عن خلعه ..لوتاب و أتعهد قدام حضرتك ..  
أنه هيراعى ضميره وشرف مهنته ..عشان ولاده يفتخروا بيه...  
وأنا قلبى اللى الغيرة كلته ..يرتاح ويهدى ..  
ينظر قاضينا إلى فتحى المنهار ..

- قلت أليه يا متر ..تتوب ..ولا ..تتخلع..

- أتوب ..أتوب ..توبة نصوحة..

يضحك قاضينا عاليا وهو يردد..

- بعد كده مش هنقول ..

طباخ السم بيدوقه ...

هنقول..

طباخ الخلع ..

بيدوقه ..

## الخلع الرابع ( أشدت ... كي أخلعك )

أوقف قاضينا سيارته في المكان المخصص له .. أمام مبنى المحكمة  
ترامى إلى سمعه .. صوت امرأة تشحت بعبارات غريبة .. أسند ظهره  
على سيارته ونظر ناحية المرأة .. وهو يستمع إليها وهو يبتسم لما ..  
يسمعه من عبارات الشحاتة .. والتي يسمعا لأول مرة ..  
امرأة تجاوزت الثلاثين من عمرها .. يحيط بها خمس فتيات . تتراوح أعمارهن  
بين .. الثانية عشر .. والعاشرة .. والثامنة .. والسادسة .. والرابعة ..  
تحمل طفلة على قدميها .. في الثانية من عمرها ...  
تجلس المرأة على السلام المؤدية الى باب المحكمة الرئيسي ..  
والفتيات يتحركن وهن يمددن أيدهن .. لكل من يصعد السلام ..  
والمرأة تردد ..  
- ساعدوني يا أهل الخير .. ساعدوني يا محسنين .. ساعدوا ولية  
غلبانة عايضة تخلع جوزها .. الندل .. الجبان ..  
ساعدوني أخلع الخسيس .. ولم أجرة المحامى ..  
كل النسوان الى طالعة واللى نازلة .. شحتوها .. وردت عليهم بدعواتها  
- الله يخليكي يا ختى .. وما ميغلبلكيش راجل أبدأ ..

يهديك راجلك وما تجريش تخلعيه أبدا ...  
أما الرجالة بأه .. كانت نظراتهم مليئة بالغيظ وحقد ..  
لم يفكروا حتى في وضع ايدهم في جيوبهم..  
ده غير التأسيس عليها بعبارات الأستهزاء والسخرية..  
مسكتتش ..سمعتهم من المتنقى تورة..  
- صحيح ..رجالة أندال ..عايزين الخلع ..كلكوا خسسة عايزين  
الخلع ..ألا ما في راجل واحد ..يحط في عينه حصوة ملح ..  
ويقول اساعد الولية الغلبانة دي ..صنف خسيس ..عايز الخلع  
تطقط جميع النساء من حولها في حسرة.. وخذ عندك ..  
- والنبى ..ليكى حق يا ختى ..دول عايزين الحرق كلهم..  
تشير المرأة إلى جميع النسوان اللى أتلموا حوالها ليساعدوها في لم أجرة  
المحامى ..  
- وأنتوا كلكوا كده يا حبايى ...جاين تخلعوا برضة..  
ترد جميع النسوان في صوت ملاء الغيظ والحقد ..معا وهن يصرخن  
- أيوه يا ختى ..  
- ومعاكوا أجرة المحامى ولا ذى حالاتى ..  
- أنا بعت عفش بيتى وتمت ع الأرض ..عشان أجيب أجرة .  
المحامى ..وأخلع الخسع ده من حياى ..بهدلنى يا ختى..  
- حاسة بيكى يا ختى..ربنا يعينيك ويقدرك تخلعيه على خيروتخلصى  
منه ومن أرفه..  
خرج لهم ضابط شرطة من باب المحكمة الرئيسى..  
- لو سمحتم يا هوانم ..ممنوع الجمهرة قدام باب المحكمة  
أفضلوا جوه ..وأشتموا ذى ما أنتوا عايزين ..يللا واللا..  
هضطر أدخلكم بالقوة ..  
أحدى النساء

- طبعا ما أنت راجل ذبيهم .. و كلامنا مش على هواك ..  
تدخل النسوان وهم متذمرين.. إلى داخل مبنى المحكمة  
تواصل المرأة عبارات الشحاتة  
يرجع إليها الضابط ..  
- قومي يا ست أنتى من قدام باب المحكمة..وألا هتضطرينى أقبض عليكى..  
هنا يتدخل قاضينا ..  
- سهالى أنا يا حضرة الضابط ..  
يناولها القاضى كارت ..  
- ده الكارت بتاعى ..تجيني فى مكتبى بعد ما خلص الجلسات ..  
تبص فى الكارت وترميه فى وجهه ..  
- بأه يا راجل يا خسع أنت ..بدل ما تحط فى عينك حصوة ملح  
وتحط فى أيدى عشرة ولا عشرين جنية ..تحطلى ورقة معفنة ..هقول أيه  
..ماأنت راجل ذى المعفن جوزى ..ما هو لازم تحاموا لبعضيكوا..  
الضابط غاضبا ..  
- أيه يا مرة يا مجنونة أنتى ..ده سيادة القاضى ..  
اللى بتلمى أجرة المحامى ..عشان تقفى قدامه ...  
ويخلع لك المعفن بتاعك ..  
- أرجوك يا حضرة الضابط ..دخلها مكتبى هي وبناتها ..  
أنا هشوف حكايتها أيه بعد ما أخلص الجلسة ..  
يتجة القاضى ناحية باب المحكمة ..ويأخذهم الضابط إلى الداخل..  
ينهى قاضينا الجلسة ويدخل مكتبه ..  
- أدينى فضتلك يا ستى ..قوليلى بأه أيه الحكاية ..  
- وهتخلعه ..كده من غير ما أدفع ..للمحامى المتسيط ..عماشة..  
الألف جنية اللى طالبها ..  
- المحامى المتسيط ..قماشة ..فى محامى اسمه قماشة ..

- عماشة يا خويا ..عماشة ..سلامة سمعك..  
- قوليلي الأول أياه حكايتك ..  
- أأقولك يا خويا..الراجل الخسيس جه من يومين..مونون  
وشامم..ونزل ضرب فيه وفي البنات من غير سبب..  
وراح طاردنا في الشارع..  
طلعل عماشة من تحت الأرض..وقالي أنه محامي متسيط ..  
وأن أنا والبنات صعبنا عليه ..وهيجيب لنا حقنا ويرجعنا الشقة  
ويرفع لي..قضية خلع ..بس لازم أدفع له ألف جنية الأول لزوم مصاريف  
القضية ..عشان كده بشحت ألم له الألف جنية ..  
والستات الله يسترهم دفعوا بالزيادة ومبخلوش..  
- لو سمحت يا حضرة الضابط ..تروح بنفسك تجيب لي ..  
جوزها ..وهات معاه المحامي المتسيط ده اللي إسمه ..عماشة ..  
أرسل القاضي وأحضر طعاما لها ولبناتها ..  
مرت ساعتان ..  
عاد الضابط ..  
ومعه زوجها ..وعماشة ..  
عيونهم حمراء ..تظهر على حركاتهم علامات السطل والونونة..  
يتفحصهم قاضينا بتمعن ..  
-أنت بأه جوز الست دي ..ودول بناتك..  
- أيوه يا باشا..أنا جوز الست دي..ودول بناتي..  
هما عملوا حاجة يا باشا..  
- وأنت بأه المحامي المتسيط ..عماشة ..  
- محامي أياه يا باشا ..ده أنا راجل على باب الله ..أرزقي ..  
- أمال قلت لها ليه أنك محامي وطلبت منها ..ألف جنية ..  
- مش أنا يا باشا ..ده جوزها جالي وطلب مني أعمل كده ..

ويديني ميت جنية ..وأنا راجل أرزقى ..وبعمل اللي يطلبه مني  
الزبون وفهمني إن مراته مدكنة ذهب أمها ..ورسم الخطة ..  
هو يطردها وأنا أستلقاها ..فتبيع الذهب بتاع أمها اللي مدكنة..  
بس هي دي كل الحكاية يا باشا ..  
أمشى أنا بأه يا باشا ..براءة..  
- يا حضرة الضابط ..خد المحامي المتسيط عماشة ..  
حطه في الحجز على ما أشوف حكاية جوزها ..  
قرب يا أبو البنات قولي عملت كده ليه..  
- يسلم فمك يا باشا.. ربنا حطها على لسانك ..  
أبو البنات ..  
كنا عايشين مبسوطين ورزقنا مكفيننا ..  
فضلت تزرب لى بنت ورا بنت المصاريف كتزت ..والغلا مولع الدنيا ..مبقتش  
قادر على لقمتهم ..  
أأقولها كفاية ..تقولي أما أجيب لك الواد اللي نفسك فيه..  
لغاية الحالة ما بقت كرب ..هربت بالشم من الحالة الكرب دي..  
- ليه يا ستى كده ..كان كفاية واحدة ولا أثنين عشان تعرفوا تربوهم  
وتراعوهم ..  
- دلوقتي بقيت أنا السبب ..مش فضلت تقولي أنا نفسي في واد يشيل  
أسمى بعد ما أموت ..وياخذ عزايا ..  
-المره دي أنا هسيبك عشان بناتك .. لكن المره الجاية هحبسك ..  
يلا خد عيالك ..وحاولوا تعيشوا على قدكوا ..  
وبطل الهباب اللي بتشمه ده ..

\*\*\*

بعد أسبوع..  
وبعد أن أوقف القاضى سيارته ..ترامى إلى سمعه صوت المرأة وهى تشحت  
بنفس العبارات وحولها بناتها ..  
وقف أمامها غاضبا..  
- هو جوزك عملها تانى ..  
- لا يا باشا..  
ده بقى ذى الفل.. وماشى ع العجين ميلخبطوش ..  
- أمال أبيه اللى حصل ورجعك تشحتى تانى..  
- أصل المرأة اللى فاتت..  
لميت مبلغ حلو قوى من النسوان اللى قلبها محروق م رجالتهم ..  
وجايين يخلعوهم ..  
قلت أهى سبوبة حلوة..  
تساعد ع المعاش برضك..

## الخلع الخامس خلعوك...يا سى السيد

جلس قاضينا على المنصة فرحا مستبشرا ..لنجاحه بالتوفيق بين الأزواج..  
في معظم قضايا الخلع التى عرضت عليه ..  
نظر الى الحاجب مبتسما ..  
- عندنا كام قضية خلع النهاردة ..يا بنى ..  
- عندنا اربعة ..يا باشا ..  
- هه ..ربنا يقدرنا ونوفق بينهم ..  
نادى يا بنى ع القضية الأولى ..  
- محكمة ..القضية الأولى ..المرفوعة  
من السيدة..محفوظة على عبد الرحمن لخلع.. السيد..  
السيد ياسين السيد عبد الجواد ..  
- الأسم ده مش غريب على ودانى ..  
السيد ياسين...السيد عبد الجواد ..  
لفت نظر قاضينا فى القاعة ..شاب وسيم تخطى العشرين من عمره يساعد  
سيدة تخطت الخمسين من عمرها وهى سمينة الجسم بشكل ملحوظ  
..على الوقوف ويحاول أن يشجعها...  
السيدة ترتدى يشمك على وجهها ..من التى كانت ترتدية... سيدات

- الثلاثينات .. ترفض التوجه إلى المنصة ..
- يشدها الشاب مشجعا اياها ..ويوقفها أمام القاضي ..
- أرفعى يا ست محفوظة اليشمك ده عشان اتأكد من شخصيتك ..
- يا لهوى ..مقدرش يا خويا ..ده كان قطعنى حتت ..وبالقليلة ..
- كان طلقنى فيها ..قال أفلح اليشمك ..قال ..
- مين ده يا ستى ..الى هيقطعك حتت ..ويطلقك ..
- سى السيد ..يا خويا ..سى السيد جوزى ..
- سى السيد الى أنتى جاية تخلعيه..خايفة يطلقك ما يطلقك ويريحنا -
- بعد الشر يا خويا ..قال الله ولا فالك ..
- أنتى هتجنينى يا وليه أنتى ..ما تكلم ..يا أستاذ أنت ..مش أنت
- المحامى بتاعها ..ورينى التوكيل الى معاك ..
- لا يا سيادة القاضى .أنا مش محامى ..أنا إنها البكرى..فهمنى ..
- أنا لسة سيادتك فى السنة النهائية ..فى كلية الحقوق..
- إسمك فهمى كمان ..ده كده الصورة كملت...و فىن سى السيد..
- يقف رجل تخطى الخمسين من عمره ..وسيم..رشيق..
- يهتم بملابسه بطريقة فجأة وملفتة للنظر ..يتحرك كالتاووس..
- موجود يا باشا وتحت أمر معاليك ..
- ينظر إليه القاضى بإستعجاب ..وأعجاب ..
- فهمنى الأول ..أيه تركيبة الأسماء ..الغريبة دى...
- أنت أسمك ..السيد وأبوك ياسين ..وجدك السيد عبدالجواد
- وإبنك إسمة فهمى ..يعنى أنت مؤمن قوى كده.. بسى السيد ..
- يا حاج.. ما راحت أيام سى السيد..ومهيش راجعة تانى..
- لا يا باشا ..أنا فعلا ..
- أبن ياسين ..وحفيد سى السيد..

- معقولة..يعنى أنت فعلا.. حفيد سى السيد عبد الجواد ..  
 - أأكد لمعاليك ..أنى حفيده ..  
 - ومالك نافش ريشك كده ..ده أنت بتتخلع.. ياسى السيد ..  
 ده زمان جدك ..بيتقل فى تربته م الغيظ والقهر ..المهم ..  
 أنتى يا ست محفوظة عايزة ..تخلعى سى السيد.. لية..  
 هو مقصر معاكى كزوج ..بيعاملك وحش . مبيصرفش عليكى وعلى ولاده..  
 يبضربك ..  
 - قطع لسان اللى يقول كده على سى السيد ..  
 يا لهوى سى السيد ..يعمل كده ..ده مفيش قلب أحن من قلبه ..  
 عليه وعلى ولاده..عمره ما قصر معايا..  
 يا لهوى قول كلام غير ده يا خوياشهادة لله .. سى السيد يتحط ع الجرح  
 يطيب ..ده ذى النسمة..  
 - الله أكبر ..بعد الكلام الحلو ده كلة ..عايزة تخلعيه ليه ..  
 - عشان ميحوزش عليه يا خويا ..الواد فهمى مفهنى كده..  
 - أنت بتكدب من دلوقتى..طب إستنى لما تتخرج و تبقى محامى  
 - أعمل أيه بس يا باشا ..معيشنا أنا وخواتى فى جو التلاتينات  
 أمى دى مشفتش الشارع من سنين ..أخواتى البنات لازم يلبسوا  
 يشمك وهما رايعين مدارسهم ..أتفقنا أنا وخواتى البنات نخلعه  
 عشان نعيش زى أصحابنا ونجيب كمبيوتر ونخش ع النت بأه  
 ونشوف الدنيا ..  
 - يعنى يا ست محفوظة أنتى مش فاهمة يعنى أيه خلع ..  
 وأنت يا فهمى أنت وخواتك اللى عايزين تخلعوا أبوكوا  
 عشان أخواتك يخلعوا يشمك..وأنت تدخل ع النت..ما تشوف  
 النت برة يا اخى.. وخواتك يخلعوا وهما رايعين المدرسة  
 - ما هو ده اللى بنعملة من وراه ..

- يا ابن الكلب ..يعنى بتخمونى أنت و خواتك ..طب صبرك عليه
- خف شوية على ولادك يا عم سيد أحنأ فى الألفية الثالثة ..
- وسى السيد راح .. وراحت أيامه ..وانتى يا ست محفوظة
- لازم تعرفى أن الخلع ذى الطلاق ..بس الفرق إن أنتى ..
- الى بتطلقيه ..مش هو الى بيطلقك ..أنتى عايضة تطلقيه..
- يا لهوى ..لا عشت ولا كنت ..لما أعمل كده ..سامحنى
- يا سى السيد.. العيال ضحكوا عليه يا خويا وقالولى أنك ناوى
- تجوز عليا ..وأن الخلع مش هيخليك تعرف تتجوز عليا
- فى عنجهية سى السيد
- طيب خلاص يالا أتنازلى..وأنت يا فهمى الكلب حسابنا بعدين..
- طبعا يا خويا متنازلة ..بأه الست.. تطلق راجلها وأبوعيالها ..
- بطلواده.. واسمعوده ..ده أحنأ فى زمن العجائب يا ولاد ..
- ضحك قاضينا ويشير للكاتب ..
- أكتب يا بنى تنازلت الست محفوظة وخليها توقع عليه ..
- أنا ببصم يا خويا ..
- تابعهم قاضينا مبتسما هى وأبنها ..وتعجب عندما رأى سيد يعود
- ويجلس فى مكانه ..
- ينادى الحاجب على القضية التالية..
- القضية الثانية ..المرفوعة من السيدة ..دلال محمود العطار
- لخلع السيد..السيد ياسين عبدالجواد..
- عشان كده ..
- تتجة إلى المنصة.. سيدة تخطت الأربعين من عمرها ..رشيقة . ترتدى حجاب
- ..تظهر على ملامحها علامات الذكاء ..ومعها محاميا
- مصطفى درويش المحامى ..حاضر مع السيدة دلال..
- قرب عندى هنا يا سى السيد ..عشان كده فضلت قاعد..

يقترّب سيد في أرتباك ..وعرقه مرقه ..  
- أعمل أيه بس معاليك ..النسوان أتجننت ..والله ما عارف ..  
أأقول لمعاليك أيه بس ..  
- لا تقول ولا تعيد ..الله يكسفك يا شيخ ..أيوه يا ست دلال  
عايز أسمعك ..بعد أذن المحامى بتاعك ..عايزة تخلعيه ليه ..  
أنتى باين عليكى ست ذكية ومتعلمة ..  
- أنا سيادتك معايا ..بكالوريوس تجارة ..المرحوم جوزى  
الأولانى ..ورث محل العطاره من أبوه ..بعد موته ..  
أضطريت أقف فى المحل ..وكان قريب من محل السيد..  
مسكنى فى الروحة والحية ...  
باحبك ياايض ..توبنا إلى الله ..حنوا ع المتيّم الغلبان.  
- حنوا ع المتيّم الغلبان ..دى جديدة يا سيد..  
- ما هو لازم نجدد برضة .. معاليك ..  
- لا جديدة ..وبعدين يا ست دلال ..  
- أقولك الحق ..قلبي رق له وإشترطت عليه.. أن جوازنا يفضل  
فى السر عشان أهل جوزى ..وأم عياله وعيالة ميعرفوش..  
كان شرطى التانى ..أنه ميجوزش عليا ..وعلى أم العيال تانى..  
وصلتنى أخبار مؤكدة ..أنة أجوز عليا ..فصممت ع الطلاق..  
هو رفض وأنكر..فقلت أخلعه ..وأرجع أقف فى محل جوزى اللى  
كان ضفره برقابته..وعمره ما وعد وخلف فى وعده ..وكان راجل بحق  
وحقيق..مش منظر ع الفاضى  
- عيب قوى اللى بتقولية ده يا دلال ..أنتى عارفة أنى راجل ومن  
ضهر راجل ..ووجدى سى السيد كلمته زى السيف ..  
- من ضهر راجل يا خى أتلهى على عينك ..هو أبوك ياسين  
النسونجى ..الى كان بيريل على أى مرة لابسة يشمك ..

وملاية لف... تسميه راجل.. ولا جدك.. أبو وشين.. اللي في البيت  
عامل غضنفر .. وبرة هلاس وخمورجى ..  
مش دول الرجالة اللي أنت جاي من زهرهم ..  
- كفاية كده يا ست دلال .. أنتى كسفتينى أنا وكل الرجالة..  
لو مصممة ع الخلع .. أنا هخلعهولك ..  
- طبعا مصممة يا حضرة القاضى .. لأنه نزل من عينى خلاص ..  
- الحكم بالخلع الجلسة الجاية .. وأعتبريه إتخلع..  
وأفضلوا بأه .. خلونا نشوف القاضيتين اللي باقيين..  
برضة سيد رجح وقعد مكانه .. والحاجب ينادى ..  
- القضية الثالثة المرفوعة من السيدة .. أمينة على الشبكشى لخلع..  
يكمل قاضينا ..  
- لخلع السيد ياسين السيد عبد الجواد ..  
- الله أكبر سعادتك .. وسيادتك عرفت أزاى ..  
- ما هي باينة ذى الشمس .. تعالى يا سى السيد تعالى متكسفش  
ما هو اليوم يومك ..  
- والله معاليك .. أنا وشى منك فى الأرض ..  
- والله أنت اللي حطيت وش الرجالة كلها فى الأرض ..  
تقترب فتاة فى العشرين من عمرها .. جميلة ممشوقة القوام  
تلبس الحجاب .. تتحرك بحيوية ونشاط بنات الحوارى..  
- قربي يا أمينة .. كده بقى الأسامى .. كملت ..  
أحكيلى بأة عايزة تخلعى سى السيد ليه ..  
- يا ختى بلا نيلة .. قال سى السيد قال .. الراجل يا خويا .. دخل علينا بالحنجل  
والمنجل .. وأكل مخ أبويا وأمى بحنجلته  
وكل ما أروح عنده الوكالة أجييب بضاعة لمحل أبويا..  
يحلف ميت يمين ما ياخذ تمنها.. ويفضل يقولى ..

- عارفها دى ... بضاعة أتلّفها الهوى..
- الله..ده كلكوا بأه تفين فى بقى بعض ..ما أنتوا صنف واحد ..
- صرخ الكاتب فى غضب
- أحترمى نفسك يا بت ..وأنتى بتكلمى سيادة القاضى وألا هيحبسك أحمر  
وجه قاضينا خجلا ..
- جبت لنا الكلام يا سى السيد ..الصنف المرة دى مش هويا سيد .  
المهم يا ستى أنتى عايزة تخلعيه ليه ..
- أعذرنى يا خويا أنا جاهلة وفهمى على قدى ..ومدب كده فى الكلام أوعى  
تكون زعلت منى ومتخلعوش..ده ضحك عليه وفهمنى أن أنا أول بخته..
- قلت يا بت هتورثى أنتى وعيالك الوكالة وأهو راجل عجوز فاضل له كام  
سنة ويودع..واعيش أنا وعيالى فى العز ده كلة بعد ما يودع ..يقوم ولاد  
الحلال يعرفوا أبويا ..أنه متجوزأتنين قبلى وعنده عيال يسدواعين الشمس  
يبقى يتخلع ولأ..
- أموت وعرف ولاد الحلال دول ..الى جرسونى وفضحونى  
يشير قاضينا للسيد أن يقترب منه.. ويهمس له ..
- أنا هخلعك المرة دى..لمصلحتك ومصلحة أم عيالك وعيالك..  
وبطل رمرمة ..وأنتبه لعيالك ..وأخرج بأه من عباية جدك .. وأعرف أن الزمن  
أتغير..
- عايزك تصارحنى ..الخلع الرابع.. تبعدك برضة ..
- لا معاليك ..خلاص ..هما الثلاثة دول وبس ..
- الحمدلله ..يعنى هنشوف وجوة جديدة ..أكتب يا بنى الحكم الجلسة  
الجاية..ومتخافيش يا ست أمينة سيد مخلوع مخلوع  
ونادى يا بنى ع القضية الرابعة والأخيرة ..
- يشهق قاضينا نفسا عميقا عندما يرى سيد يغادر القاعة ..
- القضية الرابعة ..المرفوعة من السيدة جلييلة مسعود الدهل لخلع ..

يتوقف الحاجب

- أيه يا بنى وقفت ليه ..

- أصل مش معقولة سيادتك .. هو برضة ..

السيد ياسين السيد عبد الجواد ..

- أتأكد يا بنى ..

- دة المكتوب .. في ملف القضية ..

- طب أحقه .. بسرعة وهاته ..

تتقدم للمنصة امرأة ملفوفة القوام تتحرك في ميوعة ودلال ..

تلبس يشمك على وجهها وملاءة لف ..

يدخل سيد و الحاجب يسحبه من يده إلى المنصة

- خير معاليك ..

- أنت يا راجل مش قلت لى ..أنهم ثلاثة بس ..

- أيوه معاليك ..

يشير قاضينا للمرأة ..

- أمال مين دى ..

- معرفش معاليك ..

ترفع المرأة يشمك من على وجهها .. وتنزع الملاءة .. وتظهر تحتها بدلة

رقص شرقى .. وتراقص أمامهم في دلال ..

- هه ..عرفتني دلوقتي يا سى السيد ..

يحمر وجة سيد خجلا ويطأ رأسه ..

- عرفتها دلوقتي ..يا سى السيد ..قولى بأه دى الرابعة ..

- الرابعة معاليك ...

- هو يقدر ينكر ..ده أنا كنت دبيت صوابى في عنيه ..

- ليه يا جليلة كده ..بأه بعد الحب الكبير اللى كان بينا تعملى كده ..

- حب أيه يا موكوس أنت ..بأه أنا جليلة اللى كبارات البلد كلها

بيتروا تحت رجليه..هبص لك يا معفن أنت..يا ابن ياسين المعفن ولاوجدك..  
 اللى كان أكبر هلاس ونسونجى فى تاريخ المحروسة كلها ..  
 - أرجوكى يا ست جلييلة تحافظى على ملافظك ..ومتنسيش أنك فى محكمة..  
 وقوليلى عايضة تخلعى المعفن..يووه عايضة تخلعى سيد ليه  
 - شوف يا قاضى ..أنا هجيبها لك كده على بلاطة ..  
 أنا عملت اللالى عشان أتجوزه ..فهمته أن أنا ست بيت محترمة  
 وعايضة أشغل فلوسى فى تجارته ..طب الجردل ورييل ..زى أبوه وجده ما  
 هو عرق ومادد ..وتجوزنى ..وهو ميعرفش أنى صاحبة أكبر كبارية فى شارع  
 الهرم ..وأنا اللى جرسته عند نسوانه ..وعرفتهم أنه متجوز عليهم ..وبعت  
 لإبنه البكرى وأديته فلوس و غويته بالبناات اللى عندى ..و خليته سحب  
 أمه عشان تخلعه وزى ما بيقول المثل ..العرق يمد لسابع جد ..الواد طلع  
 أعفن من أبوه .. وسحب أمه على عماها ..وأنا كمان اللى بلغت مراته الثانية  
 والثالثة ..أنه متجوز عليهم ..  
 فى صوت كلة هيام وحب  
 - طب والحب اللى كان بينا ..  
 - حب أيه يا مخبل أنت ..  
 - طب فهمينى أنا يا ست جلييلة ..أنتى عملتى كل ده ليه..  
 فى غل وحققد ردت جلييلة..  
 - ده تار بايت من سنين طويلة ..  
 - تار بايت من سنين ..أنت عملتلها أيه يا سيد ..  
 - لا مش الخرع ده اللى عمل..  
 ده جده سى السيد الكبير..اللى خد جدتى جلييلة لحم ..  
 ورماها عضم وسابها... وراح لزييدة العاملة..  
 حلفت على قبرها اخذ بتارها من الدهل ده..

oboiikan.com

## أبو العربي ..النايب النزية

أحنا طبعا في مدينة بورسعيد المصرية..  
وحكايتنا عن أشهر شخصية أسطورية يعرفها كل بورسعيدى..  
بل كل مصرى..وده بعد ما أتجوز من أم العربي ..وخلف منها..  
أبنة البكرى وطبعا كان لازم يكون اسمه ..العربى..  
وده واد طالع حرك وفهلوى وذكى ..  
فالح في دراسته وحاليا هو في  
السنة النهائية بكلية الهندسة ..  
على فكرة ..ده مزعل أبو العربى وقهره قوى ..  
كان نفسه يشتغل معاه في التجارة ويقف في المحل بتاعه في السوق  
لكن أم العربى بأه ..كان ليها رأى تانى ..  
وقفت له زنهارة في تعليم العيال ..  
أما بنته فتحية وأسم الدلع ..توحة .. دى بأه كبرت دماغها وخذتها من  
قصيرها ولزقت له في البيت ..مستتية ابن الحلال ..الى مجاش  
وقعدت له ذى قرد قطع ..كل همها حطته في الأكل ..  
طارق بأه واد شقاوة الشياطين في دمه ..  
توأم أبوالعربى في شبابه ..  
مبلط في الثانوية العامة بقالة سنتين ..  
أما آخر العنقود والسكر المعقود..

مرفت .. وشهرتها .. ميمي ..  
في رابعة ابتدائي ..  
دى بأه ليها دماغ تانى خالص ..  
دى بأه عيلة أبو العربي ..  
تعالوا نشوف ونسمع حكايتهم أيه ..

## الأولى

- أحنا دلوقتى الساعة ستة الصبح ....  
أم العربى فى المطبخ مع بنتها توحه بيجهزوا فطار العيلة ..  
رصوا الأكل على السفرة .. خرج لهم أبو العربى من أودته..  
بحلق لهم فى الأكل .. وصوت لهم بعلو صوته ..  
- أيه ده يا وليه .. أنتى أتتهطلى ولا أيه .. فول وطعمية وبيض وجبنة وحلاوة..  
وده أيه ده كمان .. لانشون وجبنة رومى ..  
- أيوه .. موال كل يوم .. اصطحب يا أبو العربى وقول يا صبح ..  
- أصطحبنا يا ختى وقلنا يا صبح .. بس يعنى مش كان كفاية الفول والطعمية..  
- أهم قدامك .. أشبع بيهم ..  
تديله زهرها وتخش المطبخ ..  
تطلع البت ميمى من أودتها وهى بتتاوب وتدعك عينها..  
- أيه يا ابو العربى .. فاتح جعورتك ع الصبح لية..  
- يا بت اتمدنى و قولى .. يا بابا .. ولا يا دادى .. زى وواد الذوات  
- ماشى كلامك .. فاتح جعورتك لية ع الصبح يا دادى ..  
- يرضيكى بدمتك البعزأة دي .. وبعدين يا بت متاخذنيش فى دوكة فين يا بت  
حساب البضاعة اللى خديتها م المحل امبارح .. الكشاكيل والمساطر والبرايات ..  
- يا عم صبرك عليا .. خداتناشر جنية أهم والباقي حين ميسرة  
- وحياة أمك .. أنتى واخدة بضاعة بتلاتين جنية ..  
- يا عم العيال كلها مأسفرة دى مدرسة حكومة .. مش خاصة .. اللى خدوا

- شكك واللى خدوا بالقسط ..واللى حين ميسرة..
- طب قفلى دلوقتى لحسن أمك جاية ..وتعمل لنا مصيبة لو عرفت أنك بتاجرى معايا..
- تبصلهم أم العربي فى أستغراب..
- مالكوا حطين بزكوا فى بوز بعض ..مش بعادة يعنى..
- أبدا يا ماما يا حبيبتى ..ده بابا زود لى المصروف تمنناشر جنية مش كده برضة يا دادى يا حبيبي ..
- تبظ عين ابو العربي للخارج وييص ليها بغيظ وهو بيجز على سنانه
- كده يا ميمى يا حبيبتى ..هو كده..
- زود لك المصروف ..ليه هو فية واحد يهودى مات وأنا معرفش ييوسها أبو العربي فى خدها بغيظ ويهمس فى ودانها ..
- طيب يا بنت الكلب ..الجيات أكثر ..
- يخرج عربي من غرفته حاملا كتبه يتناول رغيف ويأكل بسرعة وهو واقف ..
- يا واد أقعد أفطر براحتك ..
- معلش يا أم العربي .. عندى محاضرة مهمة وخايف آتأخر..
- طب خد السندوتشات دى معاك ..كامل فطارك ..
- ما هو فطر يا ستى ..لزمتهأ أبه السندوتشات ..ده حتى الأكل الكثير ميخلهوش يركز فى دروسه ..بعدين فين يا واد أقسط زمايلك ..الى خدوا بيها هدوم من المحل على ضمانتك ..
- فلوسك جاهزة أهى..مد أيدك..ميتين وستين جنية بالتمام والكمال
- والأربعين جنية عمولتى ..الى متفقين عليهم ..
- يخطف أبوالعربي الفلوس كلها من أيده ..
- لية كده بأه ..
- كده بأه يبقى الحساب مطبوط..أنت يا واد متعرفش الحديث

الشريف اللى بيقول ..أنت ومالك لأبيك ..ولا عايز تخالف شرع ربنا وتكفر..  
- أنت مش حافظ لناغير الحديث ده ..أنا ماشى ألحق محاضرتي..قبل ما  
يفتكر لنا حديث تانى ..

تقف أم العربي على رأس طارق لتوقظه وهو غرقان فى النوم..

- قوم يا ولة غلبتنى ..ياللا يا طاروقة ..عشان تروح مدرستك

وتوصل أختك ..ولا يعنى أنت مبتقومش ألا ..بالمية ..

- لا .. مية لا ..أدينى قمت أهو..القطار جاهز ..

يخرج طارق من الغرفة ويجلس ياكل بفجعة فيصرخ أبو العربي

- على مهلك يا ولة ..أنت بتاكل فى آخر زادك ..

- وأنت مالك يا عم ..مش أمى اللى جايبه الأكل ده من فلوسها

- ليه يا روح أمك.. والمصروف اللى بدهولها كل أول شهر ..

تقدر تنكر أنت ولا هى ..

- مصروف أيه يا راجل اللى بتدهولى كل أول شهر ..أنت فاكِر

الكام ملطوش اللى بتحطهم ..يفتحوا بيت ..ده يا دوبك يكفوك

أكلك أنت وضيوفك ..أنا هوجع دماغى ليه معاك ..

أنا سيبالك المكان و ماشية ..

- روى ..يا عايشة فى خيرى..وناكرة جميلى ..

ترجع له متغاطة وتصوخ فى وشه ..

- خير أيه.. يا بو خير أنت ده اللى بتتكلم عنه ..

طب ده أنت..وبعد خمسة وعشرين سنة جواز يا ظالم..

لسه مدفعتليش مهرى اللى أستلفته من أخويا ابراهيم..

والنتن الى ميتخيرش عنك خصمه من ورث أبويا..

- يوووه.كل يوم تسمعيني الموال اللى مبيخلصش ده ..مهر أيه

يا ولية يا مجنونة أنتى اللى عايزاة ..بعد السنين دى كلها..

- ولو..هيبجى اليوم اللى هدفك فيه مهرى ..وبفوايده كمان

- طب قفلي بأه ..وأنت يا طاروقة يا حبيبي .عايزك تمر عليه  
في المحل قبل ما تروح المدرسة ..في دفعة جيل م اللي  
بيحطوه العيال الروشين على شعرهم عشان يوقفوه لفوق..  
- لا يا عم ..أنا بعت لك كتير ..وكل مرة تاكل عليه العمولة  
بتاعتى ..وتفضل تقولى ..أنت ومالك لأبيك ..أنت ومالك لأبيك ده أنا ليه  
عندك دلوقتي بييجى تلتमित جنية وزيادة..  
- يا واد ..أنا مش عايزكم تخالفوا ..شرع ربنا..وتخشوا النار.  
مالكش دعوة أنت يا عم أنا عايز أخش النار ..

## الثانية

- يدخل أبو العربي مكتب مأمور القسم ..يسحبه مخبر من يده ويضعه أمام مكتب المأمور .. وهو مذهول ..لا يعرف السبب ..
- كاد أن يضحك عندما رأى أكثر من ثلاثين شاب..يبكون ويضعون أيديهم على رؤوسهم الزلابطة..و مفيهاش ولو شعرة توحد ربنا ..
- وأهلهم عاملين هيصة وشبطة ..يصرخ المخبر..
- تمام يا فندم ..ابو العربي والد المتهم ..طارق ..
- أهلا ..أهلا ..أشهر من النار ع العلم ..يا ابو العربي..
- في أيه يا باشا ..طارق أبني عمل أيه ..
- منتش شايف بعينك ..كل الروس الزلابطة دى ..أبنك باع لهم كريم ولا جيل ..حطوه على شعرهم ..بأوا زلابطة زى ما أنت شايف كده ..
- وأعترف سيادتك ..جاب الكريم ده منين ..
- مصمم ..ميقولش ..ألا لما يقابلك الأول ..
- طب الحمدلله ..أنا هشوف لسيادتك الموضوع ده ..ولازم يقر بالحقيقة ..أنا طول عمرى ما خالفت القانون ..ومررى عيالى على كده ..خلينى أأقابه يا باشا ..وأنا هخليه يقر بكل حاجة ..
- هاتوله طارق ..على الله يصدق فى كلامه..

يدخل طارق مسحوبا من قفاه .. مطاطى راسه .. يحضن ويسحبه  
أبو العربي على جنب .. عشان طبعاً محدش يسمعهم ..  
- راجل يا واد يا طارووقة أنك معترفتش على أبوك ..  
- أنت بتقول أيه .. أعترف عليك أزاى .. ده أنت أبويا يا جدع  
أنا فداك يا أبو العربي .. بس أنا خايف من حاجة ...  
- خايف من أيه يا حبيب أبوك أنت ..  
- خايف يعذبوني ويحطوني ع العروسة ويجلدوني ..  
ومستحملش وأضعف. واعترف على أبويا حبيبي ..  
اللى رباني وكبرني ..  
- أوعى .. أوعى يا حبيبي تضعف .. أقوى كده .. وخليك راجل ..  
- ما هو عشان معترفش .. محتاج حاجة تقوينى وتخلينى أستحمل التعذيب ..  
والأهوال اللى هشوفها ..  
- قولى أيه هيه .. وأنا أروح أحبيها لك من الأجزاخانة حالا وعلى حسابي كمان ..  
قولى يا حبيبي أيه هيه الحاجة دى ..  
- الأرجان .. الفلوس .. عمولتى اللى عندك ... حقى ولا مش حقى  
- حقك يا حبيبي حقك. أول ما نروح البيت تاخد عمولتك وزيادة  
- دلوقتى .. وألا .. هضعف واعترف .. أنا ليه عندك .. تلتميت جنية  
وعمولة عملية الجيل .. تمانين جنية .. بيقوا .. ربعميت جنية  
- طب وعملية الجيل ليه .. دى متمتش ..  
- أنا عملت اللى عليه وبعثهم يبقى أخذ حقى حقى ولا لأ .  
- حقك .. حقك ..  
- أيدك على ربعميت جنية .. قبل ما أنهار م التعذيب .. واعترف  
يضع أبو العربي يده فى جيبه متردداً وفجأة يدخل رجل .. ذات هيئة مهيبة ..  
يقف له المأمور مرحباً .. فيعيد أبو العربي النقود لجيبه ..  
ويجرى عليه وهو يبكى بحرقة ..

- أهلا بناينا الكبير..ومراعى مصالحنا..
- أهلا ابو العربي ..بتعمل أيه هنا عند سيادة المأمور ..
- أبني يا سيادة النايب ..هيضيع مستقبله ..
- طب أهدي كده وبطل عياط..فهمنى بالراحة أيه الموضوع..
- أنا منساش وقفتك معايا في الأنتخابات ..ومحتاجلك كمان في اللي جاية ومهما كان اللي عمله أبنيك ..هنخرجه منها إن شاءالله..بس بالقانون ..أحنا ناس بتوع قانون..وكلة يتحل... بالقانون..ولا أيه يا سيادة المأمور ..
- كدة سيادتك ..وهنحلها حالا ..وبالقانون..
- يلطم طارق على خدوده..
- بدال اتحلت وبالقانون ..
- يبقى أنا اتسحت ..
- وبالقانون

oboiikan.com

## الثالثة

يجلس أبو العربي على سريره وهو يفكر بعمق  
- بأة النايب..حاجة مهمة قوي كده..ده خالص الموضوع مع  
المأموروالعيال وأهلهم..وخلاهم يتنازلوا عن المحاضر بكلمتين  
الله ما أنت يا واد يا أبو العربي اللى بتتنجحه فى الانتخابات  
وأهل بورسعيد كلهم بيمشوا وراك..لما يلاقوك واقف جنبه  
الله مانا أولى ..يعنى أنا لو رشحت نفسى ..أكيد هكتسحه ..  
ده أنا أشهر واحد فيكى يا بورسعيد..شوف بأه لما أخش على المأمور ..ويقوم  
يقف لك زنهار ..  
يقطع أفكاره دخول العربي ..  
- جيت فى وقتك ياواد يا عربى ..أنت يا واد متعلم ..ومخك متفتح عايز أخذ  
رأيك فى موضوع شغلنى ..  
-الأول أنا عايزك تفوتلى قرشين من فلوسى عندك ..لحسن  
محتاج أشتري كام كتاب للمشروع بتاعى فى الكلية ..  
- فلوس أية يا ولة اللى ليك عندى..أنت نسيت الحديث الشريف اللى  
بيقول..  
- عارفه وحفظه صم..أنت ومالك لأبيك ..بس مزنوق عشان المشروع ..ده  
البكالوريوس ..ولا عايزنى أسقط ...

- ما تروح لأمك .. ما فلوس الورث بتاع أبوها .. حطاه على قلبها  
وصرة .. سيك م الكلام الفارغ ده واسمعنى كويس .. أيه رأيك يا ولة لو أبوك  
رشح نفسه فى مجلس الشعب وبأه نايب ..  
- يا خبر أسود .. دى تبقى نايبة سودة ..  
- سودة عليك وعلى اللى خلقتك فى يوم واحد .. هو النايب بتاعنا أحسن منى  
فى أيه .. ولا يكونشى أشهر منى ..  
ده ما فى حد فيكى يا بورسعيد ميعرفش أبو العربى . وجدعنة أبو العربى ..  
ونزاهه أبو العربى ..  
- أنت فى حته النزاهة دى .. أبصملك بالعشرة ..  
- يبقى أشرح نفسى .. ولا لأ ..  
- تشرح نفسك طبعاً .. وأنا وكل صحابى فى الجامعة  
هنصوتلك .. ده غير التجار زمابلك .. يعنى ناجح .. ناجح ..  
بس لازم تلحق تسحب أستمارة ترشيح لحسن النهاردة آخر يوم ..  
ينط من على سريره .. ويرتدى ملابسه بسرعة ويخرج مسرعاً ينادى عربى على  
أمه وأخواته .. تسأله ميمي ..  
- ماله دادى يا عربى .. مش بعادته .. يفوت الفطار ..  
- أفرحى يا ميمي .. هتبقى بنت سيادة النايب .. وأنتى يا توحة  
العمرسان هيقفوا على بابك طواير .. أما أنتى يا أم العربى  
هتبقى مرات سيادة النايب النزية .. فىن طاروفة كمان عشان  
يفرح معنا ..  
- نايب أيه يا وله .. يخى نايبة لما تشيله .. وتريحنا منه ومن  
بخله ونتاجته ..  
- أأقعدوا كده .. وفتحوا مخوكوا معايا .. دى فرصة مش هتتعوض  
وكل اللى له حق عند أبو العربى هياخده وبرضاه ..

- يعنى أيه يا وله ..يعنى أنا ممكن آخذ مهرى ..لما يكون نايب  
- أنتى هتاخدى مهرك يا أم العربى ..بس قبل ما يكون نايب..  
لأن الناس مستحيل تنتخبه ..هما يضحكوا على فشره ومزعه  
أهما ينتخبوه ..ده فى أحلامه و بس..  
- فهمنى يا وله أزاي ..  
- أحنا هنشجعه ..ونفهمه أن أحنا واقفين معاه ..وأنه هيك تسح  
ونسبیه يطلع اللى تحت البلاطة ..عشان الدعاية الأنتخابية  
والذى منه وبعد ما يدبس ورجله تيجى فى الخية..  
هوب ..نهدهد بفضيحة ..لو مرجعش لكل واحد منا حقة ..  
أنتى يا أم العربى ..أطلبى مهرك هيدفعلك مهرك غصب إن عنه وبالفاويد  
كمان..بس فكروا معايا .. أيه الفضيحة اللى تخليه يسلم..فكروا معايا..ما  
تقولى حاجة يا أروبة أنتى ..  
تحط البت ميمى الأروبة صباعها على رأسها  
- أيه هى الفضيحة..يا بت يا ميمى يا أروبة ..أيه هى الفضيحة  
آه ..مفيش غيره ..  
يصرخ الجميع  
- أيه هى..  
- الخلع..  
- الخلع..  
- أنا لسه شايقة فيلم فى التلفزيون ..واحدة حبت تفضح جوزها  
قامت رفعت عليه ..قضية خلع..  
يقبلها عربى فرحا  
- يسلم دماغك الذرى ده يا أروبة..هو الخلع مفيش غيره..  
أحنا نسيبه ..يعمل دعايته ..ونظمنه إن أحنا معاه..  
وأنتى يا أم العربى..قومى إلبسى..هنوصل ناخذ فى سكتنا محامى صاحبى

..ونرفع قضية الخلع ..ونستلم أحناء الأعلان فى الخباثة ..وقبل يوم التصويت  
..نقلبه ونسلخه زى ..ما أحناءايزين..يا كده ..يا نفضحه ونجرسه فى بورسعيد  
كلها

- طب يالا يا وله .. مستنى آيه ..

أموت واخذ مهرى منه ..

وأنتى يا بت يا توحة..أبقى فهمى الواد طارق ع الفوله كلها

- ما تسيبوه يرشح نفسه ..

خلونا نجوز ونخلص ..

## الرابعة

قاعد أبو العربي في الصالون ..يعيط وينهنه بحرقة ..الدموع نازله تسح من عينه زى المطروقدامه فلزات كبده الخونه  
و أم العربي تزغر له بشماتة وغيظ. وتشفى غليل سنين من القهر ..  
- أيوه ..أنشحفت ونهنة يا خويا ..حركاتك دى..مبقتش أكل منها..أوعوا يا  
ولاد تاكلوا م الكلام ده وقلبكوا يحن..من حركاته ديه ..  
- كده يا أم عيالى ..وعشرة عمري ..هان عليكى أبو العربي ..  
الحب كلة ..العمر كلة..  
- والنبى لما تعمل اللالى ..هتدفع مهرى وشبكتى ..ودلوقتى ..  
والا هفضحك وجرسك في بورسعيد كلها ..وبأه شوف مين  
الى هينتخب واحد هُزأ زيك ..مراته خلعا..  
- وأنتوا يا ولاد عمري ..وفلزات كبدى ..هان عليكوا أبوكوا  
- ما أنت يا با وكالنا ..في الطالعة والنازلة ..قاعد تدعى لنا  
الفقر ..ودلوقتى بتصرف بالألوفات ع الدعاية ..وعلى شوية  
المقاطيع الى أتلموا حواليك واستقطعوك ..وكبروها في دماغك..وأحنا ولادك..  
فلزات كبدك واكل حقنا وفلوسنا ..  
- فلوس أيه الى بتتكلم عنها يا طاروقة يا حبيبي ..هو فيه  
بين الأب وولاده فلوس برضة أنت متعرفش الحديث الى الجميع يقاطعه

ويرددوا معا

- أنت ومالك لأبيك ..

- كده.. يعنى مفيش فايدة.. طب طلباتكوا أيه..

- مهري وشبكتى ..عشر تلاف جنية ..غير فوايدهم خمسة

وعشرين سنة ..يطلعوا كام دول يا واد يا عربي ..

- يطلعوا يبجي ..ميت ألف جنية ..

- ميت ألف تعبان لما يلوشوك أنت وأمك ..

- والله ..بين البايع والشارى يفتح الله..يالا يا ولاد..

ننزل للناخبين بتوعه نجرسه ونوريهم ورقة الخلع ..

- ما تصبرى يا ستي ..ماشى.. موافق ..ربنا ع المفترى ..

- ترجع للعيال فلوسهم بالمليم ..الى تعبوا وشقيوا بيها ..

- موافق ..خلاص أنزل بأه للناخبين بتوعى ..وتيجوا معايا

عشان يعرفوا ..أنكوا مأيدي ..ووقفين جانبي ..

- وحياة أمك ..أنت الأول تطلع ع البنك ..تحط الميت ألف ومعاك الواد

العربي ..رجله على رجلك..تسلمه ورقة البنك أحنا معاك ..آه ..ما هو العيال

مفطمنى على كل حاجة..

تدفع ..هتبقى النايب النزية ..

متدفعش ..

هتبقى ..

المجرس المخلوع..

## الخامسة

قاعد أبو العربي في الصالون .. يعيط وينهنة بحرقه شديدة ..  
وقدامه .. فلزات كبده .. يواسونه وهم يكتمون ضحكاتهم ..  
- أنا أبو العربي .. أسقط السقوط المتنيل بستين نيلى ده  
أكيد الانتخابات دى مزورة .. زوروها .. وأكيد الحزب هو اللى  
زورها عشان مدخلش المجلس وأكشفهم .. واكشف فسادهم ..  
- يا ابا حزب أيه اللى هيبصلك بس .. ده أنت ساقط .. باكتساح ..  
- لية يا عربي .. هو أنا خدت كام صوت يا وله ..  
- كام صوت أيه بس .. هو صوت واحد مفيش غيره ..  
ترد أم العربي  
- ده أكيد صوتي .. مهنتش عليا .. ولا هانت عليا العشرة ..  
- وصوتكوا أنتوا .. يا ولاد الكلب .. فين ..  
بيتسم عربي  
-أنا مطلعتش بطاقة انتخاب من أصله .. لأني مش مؤمن أن فيه انتخابات  
نزیهة وحره في البلد دى ..  
أما فلزة كبديك طارق باع صوته للمرشح اللى قصادك ..  
بميت جنیه ..  
اللغز اللى محيرنى

فین صوتك أنت..  
تصرخ ميمى وهى تجرى على غرفتها هربا منه ..  
-باعه للمرشح اللى قدامه ... هيمت جنية ..

## و قلبت بجد

حكايتنا هي حكاية نجم النجوم ..ماجد البشر ..رجل هباه الله كل شئ..  
بهاء الطلعة في وسامة محببة ..شباب فهو تخطى الثلاثين من عمره وهو في  
كامل حيويته وبهاء..

يمتلك الشهرة..والمجد..والمال ..الذى كان يصرفه ببذخ ..  
هوفتى أحلام كل ..المراهقات ..بل كل النساء ..

نجم الشباك الأول ..تكتسح أفلامه كل أفلام منافسيه..لأقبال..الجنس اللطيف  
بجميع أعمارهم على أفلامه ..كان موضع حسد من جميع الرجال..اطلق عليه  
..طور الوسط الفنئ..

لكثرة علاقاته..النسائية..وفضائحه ..التي تملأ المجلات الفنية ..  
وجرائد الفضائح الصفراء..المنتجون ..يقفون على بابه بالطواير ..ليقبل  
بطولة أحد أفلامهم ..  
ولكنه ..

إرتكب الخطيئة الكبرى التي لا تُغتفر..في حق نفسه أولاً..  
وفي حق ..كل معجباته من الجنس اللطيف ..وفي حق المنتجين ..  
الذين كانوا يجنون من وراء فضائحه الملايين ..  
لقد وقع في الحب ..  
أحب حنان..

الممثلة الصاعدة التي كانت في بداية مشوارها الفني. وزاد الطين بلة ..  
وقرر الزواج منها ..وقد كان ..  
تمت المأسة ..  
ومر على زواجهما ...سنة.. بالكمال والتمام ..  
فدعونا نرى ..  
ما حدث له..

## الأولى

- جلس نجم النجوم يتناول أفطاره ..وقد طالت لحيته ..وضاع بهاء وجهه  
..يتصفح جريدة أمامه .وتحيط به ..مجلات مفتوحة ..بأعداد  
كبيرة ..يلقى الجريدة وهو يصرخ غاضبا ..
- مش ممكن ..مش معقول..ده جنان اللى بيحصل ده..ولا خبر عنى  
تدخل امرأة ترتدى السواد عينيها باظة لبرة ..تضع له الطعام  
ينظر لها بفزع واستغراب ..
- أنتى مين يا ست انتى ..
- ترد عليه حنان ..بعد أن جلست أمامه على السفرة ..
- دى الخدمة الجديدة ..يا حبيبي ..
- الخدمة الجديدة ..امال جولى راحت فىن ..
- جولى أنا رجعتها لمكتب التخدميم ..وجبت بدلها ..ريا ..
- تمشى جولى وتجب لنا..ريا ..يا شيخة حرام عليكى ..
- دى شبة..ريا فعلا ..وعملتى كده ليه ..
- توفير ..يا حبيبي ..توفير ..
- توفير ..أنا هروح البنك أسحب لك أى مبلغ أنتى عايزاه ..
- وترجعى جولى حالا ..
- مفيش داعى يا حبيبي ..البنك بعث لك جواب..بيهددك فيه أنه ..

هيفل حسابك ..لأنك بتسحب دلوقتي ع المكشوف ..

- أنا بسحب ع المكشوف ..

- يا ما قلت لك يا حبيبي ..أمسك أيدك ..تقولى ..ده عقد فيلم واحد

يغطى كل ده ..و العقد مجاش ..والفلوس خلصت..

- أزاى ..أنا هتتجن..ولا خبر واحد عنى.. فى أى مجلة أو جريدة ولا..منتج

واحد يتصل حتى بتليفون ..أيه اللى حصل ..أنا مش

فاهم حاجة...

-أنا يا حبيبي عايزة أقولك من زمان ..بس خايفة أجرح شعورك

الرقيق ..المرهف ..الحساس ..

- انتى بأه عارفة السبب ..وأنا نايم فى العسل ..لازم تصارحيني

بالحقيقة مهما ..كانت مرة ..وهتجرحنى ..ودلوقتي..أرجوكم

- اهدا يا حبيبي ..اهدا ..هقولك على كل حاجة ..لأننا لازم نلحق ..

قبل المصيبة ما تزيد ..ونبيع كل اللى حيلتنا ..

- كمان ..بأه أنا نجم النجوم ..يدهدر ..بيا الحال بالشكل ده ..

- اهدا يا حبيبي ..وخلينا نفكر بهدوء ..

- ادينى هديت قوليلي بأه ..أيه السبب..

- جوازنا يا حبيبي ..هو السبب ...

- جوازنا ..أزاى؟؟؟

- أنت يا حبيبي كان جمهورك..من البنات الروشين المراهقين اللى

بتمثل لهم فتى أحلامهم ..مش بس المراهقين .كل الجنس اللطيف

حتى المتجوزين ..والمطلقات ..والأرامل ..أنت كنت بالنسبة لهم

الراجل اللى بيشفوه فى أحلامهم ..

- طب وأيه اللى اتغير ..

- لما أتجوزتنى ..ضاعت آمال المراهقات اللى كانوا بيجروا ..

وراك فى كل حتة ..ويخشوا أفلامك ..عشان يشوفوك ..

وكل واحدة منهم بتعلم .. أنك في يوم من الأيام ..هتكون من نصيبيها.طبعاً  
 الحلم ده ..اتقتل لما اتجوزت ..واتنقل لنجم تانى ..  
 - يعنى أيه الكلام ده ..يعنى عشان أفضل نجم النجوم ..  
 لازم أفضل عازب ..ومتجوزش ..  
 - بالظبط يا حبيبي ..عشان كدة أنا فكرت ..وقلبت الموضوع  
 وجبته يمين ..وبعدين جبته شمال ..لحد ما لقيت ..الحل..  
 - الحل ..وأيه هو الحل ..  
 - أنك لازم ترجع عازب ..ومش كده وبس ..وترجع بفضيحة  
 - أرجع بفضيحة ..  
 - ومش أى ..فضيحة ..  
 فضيحة تهز الوسط الفنى كله ..وتفكر الناس بفضايحك بتاعة زمان وترجعك..  
 طور الوسط الفنى تانى ..والجرايد والمجلات تتكلم عنك وعن فضايحك  
 والمنتجين يرجعوا يجرواوارك..ويوسوا أيدك كمان ..عشان توقع لهم عقد ..  
 - وهى أيه الفضيحة دى..الى تعمل ده كله ..  
 - الخلع ..  
 - الخلع ..عايزة تخلعيني يا حنان ..بعد الحب الكبير اللى حبتيهولك  
 - وأنا كمان يا حبيبي ..أنت عارف ومتأكد من حبي ليك ..وأنى  
 مقدرش أعيش من غيرك ..ومن غير حبك لحظة واحدة ..  
 - آمال أيه اللى ..بتقولية ..لخبطتيني ..  
 - يا حبيبي ..دى مجرد ..أشاعة هنطلعها ..  
 - أشاعة ..طب ليه منطلعش ..أشاعة طلاق مثلا ..  
 - الموضة يا ماجد يا حبيبي اليومين دول..الخلع ..  
 الطلاق خلاص..بأه موضة قديمة ..ومش هيعمل الفضيحة اللى احنا عايزينها  
 ,شوف بأه مانشيتات الجرايد ..لما تطلع وتقول ..  
 خلع نجم النجوم ..خلع طور الوسط الفنى ..

- ياااااه ..دى هتبقى فضيحة الموسم .
- فعلا يا حبيبتى..ويرجع اسمى تانى ..يملا المجلات والجرايدالصفرا ..بس  
هنطلع الأشاعة دى ..أزاي .
- لا ..دى بأه تسيبها عليا ..أنا عارفة هسربها عن طريق مين..  
- مين ..
- مفيش غيرها ..أنهار الذومبجى ..
- يا خير أسود ..ملقتيش غير أنهار الذومبجى ..  
دى تقبل العما ولا تقبلنيش ..
- وهو ده المطلوب ..ومتناساش ..
- أنها أكبر ذومبجية فى الصحافة الصفرا ..وتموت فى الفضايح ..  
شفت يا حبيبي ..حبيبتك حنان فكرت لك فى كل حاجة..  
عشان تسترد عرشك..وترجع نجم النجوم  
وترجع للقبك..  
طور الوسط الفنى ..

## الثانية

- أم حنان في فزع ..تسأل إبنتها حنان ..  
- أيه الحكاية يا حنان ..جايباني على ملا وشي ليه ..  
لازم تيجي حالا يا ماما ..محتاجاكي جنبى ..فهميني ..أيه الحكاية  
وجوزك فين ..ده مش بعادة يخرج ويسيب البيت ..  
- اهدى يا ماما واقعدى،وأنا هفهمك على كل حاجة ..المهم قفلتى شقتك  
وجبتى هدومك لأنك هتقعدى معايا هنا كام شهر ..  
- ليه هو المنتيل على عينه سى نجم النجوم بتاعك ده راح فين ..  
ياااه أنا مقبلوش لله فى لله ..لا هو ولا أبوه ..واحد فى نفسة قلم وفاكر أن  
مفيش ع الأرض غيره..ولا أبوه ..الى ماشى فى كل حتة يتفشخر بابنه..مفيش  
على بقه غيرهذا الشبل من ذاك الأسد  
يا خي يتنيل على عينه..العجوز المهكع ..هو وابنه ..  
- يا ماما اهدى ..ومتبوظيليش الخطة ..  
- خطة ..خطة أيه..  
- خطة ..هترفع أسم بنتك فى السما ما بين يوم وليلة ..  
الشهرة والمجد ..هيجو لغاية باب بنتك ..والمنتجين هيتسابقوا ..  
عشان..اكون بطلة أفلامهم ..والفلوس هترتمى تحت رجلية ..  
- أراى بأه يا فالحة وسى نجم النجوم..واقف لك زى العقلة فى الزور..

- ما هي دي بأه الخطة الجهنمية اللي رسمتها بنتك ..  
ومعرفش أزاى .. ماجد وافق عليها ..  
- أنا مش فاهمة حاجة خالص ..  
- مش مهم .. المهم أنك هتتعدى معايا هنا ..  
عشان .. أنهار تصدق الأشاعة .. وتنشرها في مجلة الحقيقة ..  
بتاعة الفضايح .. وبعدها هيتفتح على مصراعية باب المجد والشهرة ..  
للنجمة حنان ..  
تدخل عليهم .. الخادمة ريا ..  
- في واحد ولا واحدة .. اسمها . أنهار زميلك .. ومعها .. واحد قزعة كده حاطط  
على قلبه .. شوية صناديق بيسألوا عليكى يا ستى ..  
- دخلهم بسرعة الصالون .. أنا نازلة لهم حالا ..  
- مين .. أنهار زميلك دى ..  
- أنهار الذمبجى يا ماما .. في حد في البلد ميعرفهاش ..  
مش وقته دلوقتى .. أنزلى ضايفهم .. لغاية ما حط ما كياج الحزن  
واللوع .. على وشى .. يالا يا ماما .. بسرعة ..  
- طيب أدينى رايحة أهو .. لست زميلك بتاعتك لما أشوف  
آخرتها أيه معاكى ..  
تدخل أم حنان الصالون وترحب بأنهار وهى امرأة تخطت  
الأربعين من عمرها .. تتشبه بالرجال فى ملابسها .. تضع  
كاب على رأسها .. وتمسك بايب فى يدها لا تدخنه ..  
ترفع رأسها فى قلاطة .. ترتدى نظارة سوداء .. ومعها شاب يقترب من الثلاثين  
من عمره .. قصير القامة .. يضع ثلاث كاميرات على صدره ... وهو مصورها  
الشخصى .. فلاش  
- أهلا .. أهلا .. ست زميلك ..

تسلم عليها بأطراف أصابعها في إستياء ويصرخ فلاش  
- الذميجى يا هانم ..الست أنهار الذميجى ..  
الصحفية المتسيطة ..قنبلة الصحافة الصفرا ..  
- قنبلة ..وصفرا كمان..يا ستار يا رب ..  
- طبعا يا هانم ..دى ذمبة منها ..تطلع أصغر فنان ..فوق فوق فى السما..  
وذمبة تانية ..تنزل ..أكبر نجم ...تحت تحت ..فى أسفل سافلين ..وتنزله  
لسابع أرض..  
- اللهم ما أحفظنا يا خويا .. هى مبتتكلمش ليه ..هى خرسا..  
- دى يا هانم متتكلمش الا فى حالة واحدة بس..  
لما تيجى تفقع ذمبة..  
تدخل حنان وهى تمسك منديل فى يدها وتدعى البكاء ..ترحب بهم  
و ترقى فى أحضان أمها باكية ..يهدأها فلاش ..  
- أهدى يا نجمة أرجوكى ..عشان ستنا وتاج راسنا تفهم منك تفاصيل  
الحكاية الى قولتيها فى التليفون..  
وأنها هتبقى قنبلة الموسم ..وهترج الوسط الفنئ كلة..  
أيه بأه الحكاية ..  
- الحكاية بإختصار..أنى مبقتش قادرة استحمل عشرته أكثر من كده..طلبت  
منه الطلاق رفض..فإضطريت أرفع عليه ..قضية خلع  
- هایل ..هايل ..يا نجمة ..ده خبر فعلا قنبلة ..ولا أیه يا أستاذتنا  
تهز أنهار الذميجى رأسها موافقة ..وتوشوش ..فلاش فى أذنه  
فيصرخ ..  
- فعلا ..فعلا ..الله ينور عليكى يا أستاذة أساتيد الذنب ..هو ده  
شوفى بأه يا نجمة المستقبل ..أنتى طبعا عارفة إن احنا أسم مجلتنا ..الحقيقة..  
ولا ننشرألا الحقيقة المثبته بمستندات رسمية ..  
الأستاذة طالبة منك طلب بسيط قوى ..الورقة الى خدتيها من المحكمة ..لما

رفعتى قضية الخلع ..عشان ننشر الخير..

واحنا ضهرنا محمى بيها ..

ترتبك حنان

- آه.. طبعاً ..الأستاذة عندها حق ..بس الأوراق كلها عند محامى العيلة ..

تقف أنهار وفلاش

- طب نستأذنك يا نجمة..عشان الست وراها ذمبة فى حجة ثانية

وأول ما توصل للأستاذة الأوراق..سيبى أنتى الباقي ع الأستاذة

يخرج فلاش وأنهار ..

تجلس حنان تفكر بعمق ..تتناول التليفون وهى تقول ..

- أيوه ..مفيش غيره الأستاذ سحتوت المحامى ..

ده محامى العيلة

وهو اللى هيفهمنى أعمل أبه ..

## الثالثة

يضع ماجد يده على جرس باب شفته ولا يرفعه الا عندما تفتح  
ريا الخادمة الباب ..يدفعها بشدة وهو ينادى على حنان بعصبية شديدة  
..ووراءه أبيه ..كل منهما ..يمسك مجلة الحقيقة في يده  
تقابلهما أم حنان ..بعصبية ..وهى الأخرى تمسك مجلة في يدها  
- بتزعق كده ليه..أنت ليك عين أنت وأبوك تيجوا برجلكم لحد هنا بعد  
الفضايح والجرس دي كلها..وبعد ما أتكشف المستور  
يا أكذوبة ..  
يرد أبوه..صارخا  
- أنا أبني..مش أكذوبة..كل ده..كذب وأفترا..أنا أبني صاغ سليم وذى الفل ..  
- يا خى والنبي تتلهى ..فالح بس فى الروحة والجية ..  
هذا الشبل من ذاك الأسد ..هذا الشبل من ذاك الأسد ..  
يا حتى بلا نيلة..  
- ولسه بقول ..وهفضل أقول ..هذا الشبل من ذاك الأسد..  
يُهدأ ماجد أباه  
- أرجوك يا بابا تهدى شوية ..أحنا مالناش كلام معاها ..فين حنان  
- أنت عايزها ليه ..لو عندك كلام قوله للقاضى فى المحكمة  
- محكمة أيه بس يا حماق ..ده كله كذب .ومتفقين عليه أنا وحنان  
هى فين..يا حنان..يا حنان ..لازم المهزلة دى تقف حالا..

تدخل حنان وهى تنظر فى الأرض..فيمسكها ماجد من ذراعها  
بعنف ..صارخا..وهو يشير لها بالمجلة ..  
- تسمى تفهمينى يا هانم ..أيه الكلام الفارغ اللى نشرتة ..  
أنهار فى المجلة ده ..بأه أنا أكذوبة الوسط الفنى ..  
طور الوسط الفنى تكشفه زوجته ..  
الفنانة حنان عاشت لمدة عام فى حرمان وعذاب كإمرأة..  
بأه أنتى كنتى عايشة معايا فى حرمان وعذاب..  
ترفع أم حنان يده من على ذراع حنان ..  
تأخذها فى حضنها..  
- أبعد أيدك عن البيت ..  
أنت عايز تضربها ولا أياه ..  
أفضل أطلع برة وخذ معاك الأسد أبوك .. و الا هبلغ البوليس ..  
- أنتى موافقة يا حنان ..على كلام أمك ..  
تضع حنان وجهها فى صدر أمها ..  
يسحبه أبوه من يده ..  
- يالا يا ماجد يا ابنى ..الظاهر مفيش فايدة ..  
ميعادنا فى المحكمة ..يا هانم ..

## الرابعة

في قاعة المحكمة يقف ماجد مع أبيه والأستاذ فتحى عمارالمحامى ماجد  
يحتضن في صدره ظرف كبير لصورأشاعات طيبة..  
يلمح أنهار تدخل من باب القاعة ومعها فلاش ..يجرى ناحيتهم وهو يصرخ  
في عصبية شديدة ..  
- بأه ..أنتي يا أنهار ..تدينى أنا الذمبة دى ..إن ما كنت أقفلهاك..  
يحتضنة فلاش لحماية أنهار ..  
- ماسكة كويس ..يا واد يا فلاش ..  
- متخافيش يا ستنا ..أحنا فداكى ..  
- بدل ما تتشطر عليا ..روح أتشطر ع اللى فضحتك ..  
ورفعت عليك القضية عشان تشتهر ..وتبقى نجمة النجوم ..  
يهدأ ماجد  
- لأ..فى دى عندك حق ..  
يتركها ماجد ويجلس بجانب والده والمحامى ..  
وتنظر أنهار إلي فلاش فى فرح  
- أيه رأيك يا واد يا فلاش ..فى الذمبة دى ..  
- أستاذة أساتيذ الذمبجية كلهم ..عبقرية لن تتكرر فى تاريخ الصحافة الصفرا  
يا ست..

تدخل حنان القاعة وهي تغطى وجهها بجريدة ومعها سحتوت  
ويجلسوا في نهاية القاعة حتى لا يراها ماجد ..

كان يستمع إلى محاميه بتركيز شديد ..

- القضية هايفة ومتستحقش اللى بتعمله فى نفسك ده ..

أحنا معانا الشهادات الطيبة من أكبر دكاترة ومدعمة بتحاليل وصور الأشعة.

اللى بتثبت أنك سليم ومية مية ..اللى يهمنا هنا مش قضية الخلع ..اللى

يهمنا نثبت أنك سليم ..وأن كل اللى أتقال ده كذب وتلفيق ..أحضرنا يا

أستاذ بشري ..

- أبوه يا ماجد يا ابنى ..أهم حاجة نثبت أنك سليم وكامل الرجولة وزى

الفل ..

- أنا حاسس بإهانة كبيرة قوى ..

- لأ ..أنا مش عابزك تفقد ثقتك بنفسك كده ..قول ورايا يا وله ..

أنا جامد ..أنا قوى ..أنا عنتيل ..قول يا وله ورايا ..

يردد ماجد بدون حماس ..فيصرخ فيه ..

- قول يا وله ورايا و بحماس وقوة ..أنا جامد ..أنا قوى ..أنا عنتيل

- أنا جامد ..أنا قوى ..أنا عنتيل .

- كمان ..

- أنا جامد ..أنا قوى ..أنا عنتيل ..

يدخل القاضى ويطلب من الحاجب أن ينادى على القضية الأولى

- محكمة ..القضية الأولى ..المرفوعة من السيدة حنان ذكى ..

بخلع .. السيد ماجد البشرى ..

يتقدم المحاميان الى المنصة ..

- سحتوت سحتت ..المحامى ..حاضر عن السيدة ..حنان ذكى ..

- فتحنى عمار المحامى ..حاضر عن السيد ..ماجد البشري ..

ينظر القاضى إلى سحتوت ..

- أفضل يا أستاذ سحتوت .. طلباتك ..  
يرفع سحتوت..صوته في لغة خطابية..ويتحرك أمام المنصة  
- سيدى القاضى ..إن الجريمة الشنعاء.. التى نحن بصددھا ..  
ليشيب لها الولدان في بطون أمھاتھم ..وتھتز لها أركان المعمورة حزنا وكمدا..  
إن هذا المجرم الأثيم قد مات ضميرھ..وطعن موكلتى في ..  
يقف فتحى معترضا  
- أعترض ..سيادة القاضى ..هذا تجريح في شخص موكلى ..  
- أعترضك..مقبول..راعى كلامك لو سمحت.. يا متر..  
- أعذر لھيئة المحكمة الموقرة ..فقد جرفتني مشاعرى ..كلما تذكرت ما  
عانتھ موكلتى..من عذاب الحرمان في ممارسة حقوقھا الشرعية..والتي أحلھا  
اللھ ..خدعھا هذا الكاذب..بھيئته الهرقلية الخادعة.. وصيته الكاذب..التي  
روج له ..بأنه طور الوسط الفنوفتى أحلام النساء ..و ووو..ثم ماذا ..أتضح  
أنه كذب ..  
يقف ماجد ثائرا  
- كذب ..كل ده ..كذب ..  
-استريح يا أستاذ يا ماجد أرجوك.. هيجى وقتك وتقول اللى أنت عايزه..  
أفضل يا أستاذ سحتوت كمل..بس أختصر شوية دى قضية خلع ..مش  
جريمة قتل ..  
- بل هي جريمة قتل سيدى القاضى ..قتل نفس بشرية حلمت بحياة زوجية..  
صدقت كذبه وأدعاءته التى روجھا ..ووقعت في الفخ..  
هذا الحمل الوديع ..وقع في شبكة هذا الذئب ..ومع ذلك ..حاولت ولمدة  
عام ..أن تساعدھ ..عرضته على أكبر الأطباء ..في مصر وفي الخارج ..ومفیش  
فايدة ...جلبت له من أمريكا جميع أنواع الحبوب الزرقاء الأصلية ومن  
حسابھا الخاص ..لم تبخل عليه بأى عزيز وغالى ..وبرضة مفیش فايدة...  
يقف ماجد في هياج شديد

- أنت راجل كداب ..ومفتري ..  
القاضي في لهجة غاضبة  
- إذا كررتها تاني ..هطلعك بره الجلسة ..  
يشده أبيه من يده ويجلسه..ويحاول تهدئته..  
- أحنا قلنا أيه ..  
- أنا جامد ..أنا قوى ..أنا عنتيل ..  
يشير القاضي إلى سحتوت أن يجلس  
- خلاص يا أستاذ ..المحكمة أتورت ..أفضل أستريح  
أفضل يا أستاذ فتحي ..  
- سيدي القاضي ..لسنا برجال أقوال فضفاضة ..وكلمات رنانة ..  
ونلقى بالتهم جزافا..بدون أي أثباتات ومستندات ..فنحن لدينا ما  
يثبت سلامة موكلى ..بل يؤكد فحولته الكاملة ..شهادات من أكبر الأطباء  
المعروفين بنزاهتهم ..بسلامة موكلى ..وأنه..  
يقاطعة سحتوت  
- اسمح لى يا سيادة القاضي بالرد على زميلى المحترم ..  
لسنا نشكك فى نزاهة الأطباء ..فقد يكون الأستاذ ماجد..  
سليم مائة فى المائة فى الفحوصات الطبية ..  
ويرفع صوته عاليا  
- ولكنه فاشل فى أثبات ذلك مع زوجته ..وعلى فراش الزوجية  
ولا يوجد من يؤكد ذلك ..غير زوجته وشريكته فى الفراش..  
شكرا سيادة القاضي  
يشير القاضي إليهم بالعودة لأماكنهم  
- أفضلو يا أستاذة ..وأكتب يا ابنى ...  
تؤجل القضية ..للحكم ..  
بطلاق السيدة حنان ذكى ..

خلعا..

يقف ماجد وهو يشير للقاضي بالشهادات ..

في حركات هستيرية وجنون شديد ..

يهجم على المنصة صارخا في وجه القاضي..

- أنا جامد ..أنا قوى ..أنا عنليل ..

حتى شوفوا ..حتى بصوا ..

تمت

oboiikan.com